

MESYUARAT KETIGA, PENGGAL KEDUA  
PARLIMEN KEEMPAT BELAS  
2019

**HARI KHAMIS : 31 OKTOBER 2019**

NO. SOALAN: 1

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
[SETIAWANGSA]**

**TARIKH : 31 OKTOBER 2019 (KHAMIS)**

**SOALAN NO. 1**

Minta **MENTERI PENDIDIKAN** menyatakan apakah rancangan Kementerian mengatasi masalah kekurangan peruntukan guru ganti yang serius di seluruh negara sekian lama.

**JAWAPAN**

Tuan Yang di-Pertua,

Kementerian Pendidikan Malaysia (KPM) ingin memaklumkan bahawa bagi memastikan pembelajaran dan pengajaran di dalam kelas berlangsung dengan baik, KPM sememangnya telah melaksanakan pengambilan Guru Ganti iaitu guru yang dibayar gaji hari yang ditempatkan di suatu sekolah atas dasar keperluan semasa bagi mengisi kekosongan sementara guru tetap disebabkan cuti bersalin, cuti sakit yang panjang, cuti haji, berkursus atau lain-lain hal yang dibenarkan. Pengambilan Guru Ganti dibuat berdasarkan Pekeliling Perkhidmatan Bilangan 3 Tahun 2011 Dasar dan Prosedur Pengambilan Pekerja Sambilan Harian.

Bagi meningkatkan kecekapan KPM dalam pengurusan guru ganti, KPM telah mengadakan unjuran pengambilan guru ganti. Pada tahun 2019, unjuran pengambilan guru ganti adalah seramai 21,656. Peruntukan Guru Ganti bagi tahun 2019 adalah sebanyak Ringgit Malaysia Empat Puluh Lapan Juta Lapan Puluh Tiga Ribu Dan Seratus Lapan Puluh **(RM48,083,180.00)**. Peruntukan ini meningkat sebanyak 17.6 peratus berbanding tahun 2018 iaitu sebanyak Ringgit Malaysia Empat Puluh Juta Lapan Ratus Sembilan Lima Ribu Sembilan Ratus Lima Puluh Tiga **(RM40,895,953.00)**.

Namun jika terdapat sebarang keperluan tambahan terhadap peruntukan tersebut, ia akan diberi pertimbangan sewajarnya tertakluk kepada kedudukan kewangan Kementerian.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' MOHD. NIZAR BIN HAJI ZAKARIA  
(PARIT)**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTAHANAN** menyatakan :-

- (a) apakah tindakan yang telah diambil oleh Kementerian terhadap individu-individu yang didapati menghina dan mempertikaikan tugas anggota tentera ; dan
- (b) apakah usaha yang dijalankan oleh Kementerian bagi memberikan kesedaran kepada masyarakat mengenai jasa dan pengorbanan anggota tentera di Malaysia.

**JAWAPAN**

Tuan Yang di-Pertua,

Terlebih dahulu izinkan saya untuk menjawab pertanyaan ini secara bersekali dengan pertanyaan YB Mersing pada tarikh 6 November 2019 (pada no. 36) kerana isu yang dibangkitkan adalah sama dan berkaitan.

Kementerian Pertahanan dan Angkatan Tentera Malaysia (ATM) memandang serius tindakan pihak-pihak tertentu yang bersifat menghina dan mempertikai tugas anggota ATM. Sebagai reaksi terhadap penghinaan-penghinaan yang dilakukan, kepimpinan tertinggi Kementerian dan ATM turut membuat penegasan sama ada secara rasmi atau peribadi melalui pelbagai medium komunikasi dengan mengutuk tindakan pihak-pihak tersebut di samping memberi amaran agar menghentikan tindakan tersebut.

## **NO SOALAN : 2**

Penegasan rasmi ini telah dinyatakan oleh Kementerian melalui ucapan saya pada Perhimpunan Kementerian Pertahanan dan Kempen Kibar Jalur Gemilang Sempena Sambutan Bulan Kebangsaan 2019 pada 16 Ogos 2019 dan diulang dalam Sidang Media saya selepas itu, yang turut mendapat sokongan dan sambutan baik daripada pelbagai pihak.

Dalam usaha memberikan kesedaran kepada masyarakat, Kementerian sentiasa mewarwarkan serta menonjolkan peranan, tugas dan kesiagaan anggota ATM dalam menjalankan tanggungjawab mempertahankan kedaulatan negara melalui paparan situasi sebenar tugas anggota di kawasan operasi atau perbatasan dan menonjolkan kisah perjuangan serta pengorbanan tokoh-tokoh pejuang dan pahlawan negara melalui pelbagai medium komunikasi seperti media cetak, media elektronik, media sosial dan media atas talian.

Di samping itu juga, Kementerian Pertahanan dan ATM turut memaksimakan platform sambutan Hari Kebangsaan, Hari Malaysia, Hari Pahlawan, Hari Ulang Tahun Perkhidmatan serta Hari ATM, bagi menyampaikan mesej berkaitan peranan, tugas dan kesiagaan pasukan keselamatan yang harus difahami dan dihargai oleh segenap lapisan masyarakat.

Tuan Yang di-Pertua,

Kementerian Pertahanan juga pada masa ini dalam proses akhir penyediaan Kertas Putih Pertahanan (KPP) yang bakal menggariskan peranan yang boleh dimainkan oleh segenap lapisan masyarakat agar pertahanan negara menjadi satu usahasama nasional. Insyaallah KPP ini akan dibentangkan di dalam Dewan yang mulia ini pada awal Disember ini.

**PEMBERITAHUAN PERTANYAAN**  
**MESYUARAT KE-14 PENGKAL KEDUA**  
**MESYUARAT KETIGA DEWAN RAKYAT**

**PERTANYAAN : LISAN**

**DARIPADA : TUAN LIM KIT SIANG**  
**(ISKANDAR PUTERI)**

**TARIKH : 31 OKTOBER 2019**

**SOALAN**

**YB TUAN LIM KIT SIANG** minta **MENTERI PERDAGANGAN ANTARABANGSA DAN INDUSTRI** menyatakan status terkini semakan Dasar Automotif Nasional.

**JAWAPAN**

Tuan Yang Di Pertua,

1. Sejar dengan arus perubahan industri automotif global, kajian semula NAP adalah perlu bagi memastikan industri automotif tempatan terus kekal berdaya saing selaras dengan perkembangan teknologi masa hadapan dalam sektor automotif dan mobiliti.
2. Kajian semula Dasar Automotif Nasional - *National Automotive Policy* (NAP) 2014 yang dimulakan sejak Februari 2018 bertujuan untuk menambahbaik NAP sedia ada dengan memperkenalkan elemen teknologi baharu selaras dengan perkembangan teknologi masa hadapan seperti *Next Generation Vehicle* (NxGV), *Mobility as a Service* (MaaS), dan *Industrial Revolution 4.0* (IR4.0).
3. Kajian semula ini turut memberi fokus kepada pembangunan industri automotif tempatan seperti pembangunan syarikat-syarikat tempatan, aktiviti penyelidikan dan pembangunan (R&D), peningkatan eksport termasuk mengambil kira cadangan projek kereta nasional baharu.

4. Secara kesimpulannya, kajian semula NAP digubal bagi meneruskan pembangunan sektor automotif tempatan dan keseluruhan ekosistemnya. Usaha-usaha yang khusus diberi penekanan bagi menggalakkan pembangunan teknologi NXGV, MaaS dan IR4.0 dalam sektor automotif tempatan supaya Malaysia tidak ketinggalan dalam memasarkan produk-produk automotif ke peringkat antarabangsa.

Tuan Yang Di Pertua,

5. Dalam melaksanakan kajian semula NAP, pandangan dan input daripada industri tempatan dan kementerian/agensi Kerajaan berkaitan telah diambil kira bagi memastikan cadangan-cadangan yang dikemukakan dapat memberi manfaat sepenuhnya kepada industri automotif. Secara keseluruhannya, kajian semula NAP menerima maklum balas yang positif daripada pihak berkepentingan. Langkah-langkah yang diperkenalkan di bawah kajian semula NAP akan dibangunkan secara bersama melalui konsultasi berterusan.

6. Kajian semula NAP kini berada di peringkat akhir di mana sesi konsultasi dengan kesemua pihak berkepentingan termasuk pihak industri telah selesai dilaksanakan. Pembentangan kepada Jemaah Menteri akan dilaksanakan dalam masa terdekat. NAP ini dijangka akan diumumkan pada akhir tahun 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI BUNG MOKTAR BIN RADIN  
[ KINABATANGAN ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan apakah usaha-usaha yang sedang dan akan dibuat oleh Kementerian dalam membantu meringankan beban golongan nelayan, petani dan penternak yang kian meruncing setelah kebanyakan program bantuan dan subsidi telah dikurangkan atau dibatalkan.



**JAWAPAN**

Yang di-Pertua,

1. Untuk makluman Ahli Yang Berhormat, pada tahun 2020 Kementerian Pertanian dan Industri Asas Tani bakal menerima peruntukan sebanyak RM4.9 billion berbanding RM4.4 billion pada tahun 2019 dengan kadar peningkatan sebanyak 10.9%. Daripada jumlah tersebut, sebanyak RM718.4 juta diperuntukkan bagi tujuan program/ bantuan berbanding RM663.4 juta pada tahun 2019.

2. Justeru, Kementerian telah membangunkan inisiatif berikut bagi membantu golongan sasaran iaitu nelayan, petani dan penternak:

- i. Program Rezeki Tani yang menumpukan kepada kumpulan sasaran yang berpendapatan rendah dengan kadar bantuan maksimum sebanyak RM10,000 untuk meningkatkan pendapatan melalui pelaksanaan projek-projek ekonomi merangkumi sub sektor tanaman, ternakan, perikanan, pemprosesan produk dan perniagaan tani; dan
- ii. Program Peningkatan Pendapatan Golongan B40 kepada pesawah, nelayan, penternak dan orang muda melalui projek tanaman kontan/tanaman singkat masa seperti cili, jagung manis, halia dan kunyit bagi menjana pendapatan sampingan dengan sasaran pelaksanaan pada tahun 2020.

3. Bagi mengurangkan beban golongan muda yang terlibat dalam sektor pertanian, Kementerian masih mengekalkan inisiatif Geran Agropreneur Muda (GAM) berbentuk barangan sehingga RM20,000 bagi setiap projek dan bantuan modal melalui Pakej Pembiayaan Khas Agrobank dan TEKUN Nasional sehingga RM200,000 bagi projek pengembangan.

4. Untuk makluman, nelayan akan terus menikmati insentif dan subsidi seperti Elaun Sara Hidup (ESH) serta subsidi minyak diesel dan petrol. Pada tahun hadapan, kadar ESH telah dinaikkan daripada

RM200/bulan kepada RM250/bulan. Di samping itu, nelayan terus dibantu dengan program-program sedia ada iaitu Program Pinjaman Mudah Dana Nelayan bagi sebarang aktiviti berkaitan projek perikanan dengan kadar RM1,000 sehingga RM3,000,000 mengikut skim dana dan Bantuan Sistem Penyampaian dan Khidmat Sokongan (SPeKS) bagi meningkatkan pengeluaran akuakultur melalui bantuan input benih, makanan dan peralatan bagi sangkar/kolam ternakan dengan kadar RM10,000 sehingga maksimum RM200,000.

5. Manakala bagi golongan petani, Kementerian melalui Jabatan Pertanian menyediakan bantuan insentif meliputi input pertanian, pembangunan kawasan, pembinaan pusat pengumpulan dan pemprosesan serta stor melalui Bantuan Peningkatan Hasil Sayur, Kluster Tanaman Kontan dan Pembangunan Tanam Semula Buah-buahan. Kadar insentif kerajaan yang diperuntukkan sebanyak RM10,000/ha sehingga maksimum RM50,000/ha.

6. Bagi sektor ternakan, Kementerian menyediakan bantuan insentif geran pepadanan pembiayaan bagi ternakan ruminan (Program Rintis PROPER) melalui bantuan induk pembiak ternakan ruminan (lembu, kambing, bebiri) dan Program Pembangunan Industri Tenusu Negara merangkumi aktiviti pembiakbakaan, tanaman makanan ternakan, transformasi usahawan tenusu dan peningkatan kualiti susu.

7. Dengan jumlah peruntukan yang diterima, Kementerian dan Agensi telah menyusun semula program-program yang telah dirancang melalui pendekatan *do more with less* dengan mengamalkan perbelanjaan berhemah dan subsidi bersasar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NOORITA BINTI SUAL [ TENOM ]**

**TARIKH : 31 OKTOBER 2019 (KHAMIS)**

**SOALAN NO. 5**

Minta **MENTERI PENDIDIKAN** menyatakan mengapakah terdapatnya sekolah dan institusi pendidikan didapati mempunyai banyak masalah ketiadaan Sijil Siap dan Pematuhan (CCC) atau Sijil Layak Menduduki (CF). Apakah kriteria atau asas pertimbangan KPM dalam merancang pembinaan sekolah-sekolah baharu pada masa akan datang.

**JAWAPAN**

Tuan Yang di-Pertua,

Kementerian Pendidikan Malaysia (KPM) sedar akan kewujudan sebilangan sekolah yang tidak mempunyai Sijil Siap dan Pematuhan (CCC) atau Sijil Layak Menduduki (CF). Kebanyakan sekolah yang tiada CCC/CF dibina pada tahun-tahun 50an hingga 90an. Perlu dijelaskan bahawa isu ini wujud disebabkan oleh urusan pembinaan sekolah pada ketika itu adalah berdasarkan kepada keperluan masyarakat setempat tanpa mengambil kira hal-hal berkaitan seperti pemilikan tanah sama ada tanah berkenaan adalah milik kerajaan, milik persendirian, milik ladang atau sebagainya. Tambahan pula, pada masa tersebut sijil layak menduduki bangunan daripada Pihak Berkuasa Tempatan (PBT), belum diwajibkan.

Perlu dimaklumkan di sini bahawa ketiadaan CCC atau CF bukanlah bermaksud sesebuah institusi pendidikan itu tidak selamat. Terdapat sebahagiannya disebabkan oleh kriteria atau syarat yang dikenakan pihak berkuasa tempatan seperti pembinaan atau pelebaran jalan,

## NO. SOALAN: 5

pemasangan lampu jalan atau lampu isyarat, pembinaan jejantas atau *flyover*, isu penyerahan tanah atau pemilikan tanah, isu kompaun yang belum dijelaskan kepada PBT dan pelbagai lagi.

Bagi memenuhi syarat-syarat ini, adakalanya memerlukan kos tambahan yang tinggi, sedangkan institusi pendidikan telah siap dan lama beroperasi dan syarat seperti pembinaan yang dikehendaki pula berada di luar kawasan institusi pendidikan. Syarat dan tuntutan yang dibuat oleh PBT pula berbeza antara satu sama lain, dan berbeza mengikut Negeri. Kementerian mengakui, Kerajaan Tempatan adalah di bawah bidang kuasa Negeri seperti senarai Negeri yang termaktub dalam Perlembagaan.

Sebagai permulaan, bagi menyelesaikan isu ini KPM telah menghubungi sembilan (9) orang Exco/Menteri Pendidikan Negeri secara rasmi bagi membantu KPM mendapat pertimbangan khas untuk memansuh atau mengurangkan kompaun, syarat tanah dan lain-lain yang boleh mengakibatkan kos yang tinggi kepada Kerajaan Persekutuan. Melalui pemansuhan atau pengurangan kompaun atau syarat ini, sebarang penjimatan akan dapat disalurkan kepada projek pembangunan pendidikan yang sedang dilaksanakan sekarang.

Bagi tujuan ini, KPM telah menubuhkan satu *task-force* untuk memutihkan projek-projek tersebut yang tidak mempunyai CCC/CF dengan bantuan daripada PBT dan kerajaan negeri agar projek institusi pendidikan yang telah lama dibina dan beroperasi dapat diberikan pertimbangan khas supaya kesukaran mendapat CCC / CF dapat diatasi.

Sekian, terima kasih.

RJM 47

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN EMPAT BELAS**

---

**PERTANYAAN : JAWAB LISAN**

**DARIPADA : YB DATUK HALIMAH BT. MOHAMED SADIQUE  
(KOTA TINGGI)**

**TARIKH : 31 OKTOBER 2019 (KHAMIS)**

**SOALAN**

**Datuk Halimah binti Mohamed Sadique [ Kota Tinggi ]** minta **MENTERI DALAM NEGERI** menyatakan apakah Kerajaan berhasrat untuk meminda sebarang akta atau peraturan sedia ada kepada hukuman yang lebih berat terhadap mereka yang menghina, mempersenda atau memainkan isu-isu agama demi untuk kepentingan-kepentingan tertentu.

**JAWAPAN**

Tuan Yang di-Pertua,

Terima kasih Yang Berhormat Kota Tinggi atas soalan yang telah diberikan. Walau bagaimanapun, izinkan saya untuk menjawab soalan ini secara bersekali dengan dua soalan lain yang turut membincangkan isu yang sama iaitu berkenaan dengan penghinaan isu-isu agama oleh Yang Berhormat Sembrong bertarikh 31 Oktober 2019 dan Yang Berhormat Dungun bertarikh 6 November 2019.

Tuan Yang di-Pertua, ketenteraman awam sentiasa menjadi keutamaan Kementerian Dalam Negeri bagi memastikan keamanan di dalam negara terpelihara. Sungguhpun begitu, masih wujud anasir-anasir dalam kalangan masyarakat yang mahu menggugat ketenteraman awam terutama membabitkan perkara-perkara berkaitan agama, bangsa dan institusi diraja atau 3R dengan izin, religion, race and royal. Dalam hal ini,

## **SOALAN NO : 6**

kerajaan tidak akan berkompromi. Saya ulang sekali lagi, kerajaan tidak akan berkompromi terhadap mana-mana pihak yang membangkitkan isu sensitif khususnya menerusi penyebaran maklumat yang boleh menjejaskan keharmonian kaum dan agama di negara ini. Perbuatan tersebut jika tidak dibendung, boleh mengganggu ketenteraman dan juga keharmonian yang dinikmati oleh rakyat Malaysia selama ini. Kementerian ini melalui penguatkuasaan polis akan mengambil tindakan segera dengan membuat tangkapan dan pendakwaan terhadap sebarang perlakuan tersebut.

Pada masa ini, kementerian masih menjalankan kajian lanjut berhubung pemansuhan Akta Hasutan 1948. Kementerian berpendirian bahawa kesalahan-kesalahan yang berkaitan dengan perlindungan institusi diraja, kaum dan agama perlu terus dikekalkan dengan memindahkannya ke dalam undang-undang lain sedia ada seperti Kanun Keseksaan ataupun diwujudkan undangundang baharu sekiranya perlu. Ini bagi memastikan tiada kelompangan undang-undang berlaku sekiranya Akta Hasutan 1948 dimansuhkan.

Pihak polis akan terus mengambil tindakan terhadap mana-mana pihak yang melakukan kesalahan menghina, mempersenda atau memainkan isu-isu agama. Sebarang pindaan terhadap jenis hukuman hanya boleh diputuskan setelah kajian selesai. Bagi mengekang kegiatan ini agar tidak terus berleluasa, Kementerian Dalam Negeri akan meningkatkan program kesedaran kepada masyarakat supaya lebih peka dan sensitif terhadap sentimen perkauman, keagamaan dan institusi diraja melalui kempen-kempen kesedaran bersama dengan orang awam.

Selain itu, kementerian juga akan membuat kajian dan cadangan penambahbaikan ke atas akta-akta sedia ada supaya tindakan lebih berkesan dan menyeluruh dapat diambil oleh pihak polis terhadap mana-mana pihak yang terus membangkitkan isu-isu sensitif tersebut. Pihak polis juga telah menubuhkan Unit Pemantauan dan Siasatan terhadap penyalahgunaan media sosial di peringkat daerah dan kontinjen supaya tindakan segera dapat diambil sebelum isu-isu sensitif yang dimainkan oleh pihak terbabit merebak menjadi permusuhan antara agama dan juga bangsa. Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATUK ROZMAN BIN ISLI [LABUAN]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan apakah rancangan Kementerian dalam membantu menggalakkan pelaburan dalam sektor pertanian di negeri Sabah untuk meningkatkan eksport hasil-hasil pertanian.

**JAWAPAN**

**Yang di-Pertua,**

1. Untuk makluman Ahli Yang Berhormat, Sabah sebagaimana lain-lain negeri di Malaysia mempunyai peranan yang penting dalam sektor pertanian. Tanah yang subur; muka bumi dan cuaca yang bersesuaian serta lautan yang luas menawarkan kekayaan sumber yang boleh diteroka untuk penghasilan bahan makanan di Malaysia.
2. Pada masa kini, pihak Kerajaan memberi fokus untuk menjadikan sektor pertanian sebagai sektor yang moden dan berdaya maju menerusi usaha meningkatkan pelaburan oleh pihak swasta, sama ada pelaburan langsung domestik atau asing serta pelaburan timbal balik. Bagi negeri Sabah khususnya, pihak Kerajaan sedang merangka kerjasama strategik bersama Kerajaan negeri dalam mengenalpasti bidang pertanian yang berdaya saing untuk melonjakkan produktiviti negeri Sabah.
3. Beberapa langkah telah dilaksanakan oleh Kerajaan bagi menarik pelaburan swasta. Antaranya adalah pemberian insentif fiskal iaitu kemudahan galakan cukai bagi Projek Pengeluaran Bahan Makanan yang Diluluskan di bawah Akta Cukai Pendapatan 1967. Insentif ini dalam bentuk potongan dan pengecualian cukai yang diberikan untuk menarik penyertaan syarikat dan meningkatkan pelaburan pihak swasta di dalam industri agro-makanan. Dalam hal ini syarikat-syarikat yang berkecenderungan di negeri Sabah adalah disarankan agar memohon insentif tersebut kepada Kerajaan.
4. Selain daripada itu beberapa strategi khusus juga telah disediakan oleh pihak Kerajaan dalam menggalakkan pelaburan di mana antara lainnya ialah memberikan insentif bukan fiskal seperti penyediaan infrastruktur jalan raya, sistem pengairan dan saliran, telekomunikasi bagi menarik pelabur untuk memasuki ke sesuatu kawasan.
5. Tambahan lagi, prospek pelaburan sektor pertanian di Malaysia termasuk di negeri Sabah juga diwar-warkan melalui 7 Pejabat Perwakilan Pertanian di luar negara dan Lembaga Pembangunan Pelaburan Malaysia (MIDA). Usaha-usaha yang diambil dan dilaksanakan adalah bertujuan



menjadikan Malaysia termasuk Sabah sebagai destinasi pilihan pelaburan dalam sektor pertanian.

6. Kementerian ini turut bekerjasama dengan lain-lain Kementerian/ jabatan/ agensi/ Kerajaan Negeri/ Pihak Berkuasa Koridor dan agensi promosi pelaburan termasuk dari negeri Sabah menerusi sesi libat urus serta perkongsian maklumat bagi membantu pihak pelabur untuk mendapatkan maklumat prospek pelaburan dalam sektor agromakanan.

7. Pihak Kementerian turut memainkan peranan dalam pembangunan usahawan sektor pertanian di negeri Sabah. Antara usaha yang telah dilaksanakan adalah menerusi Program Agropreneur Muda untuk membantu dan menggalakkan penglibatan golongan muda dalam bidang keusahawanan agro sepanjang rantai nilai sektor pertanian. Tambahan lagi, bagi industri asas tani disediakan insentif dalam bentuk Geran Pemadanan iaitu *Change Upgrade Product* (CUP) dan *High Impact Product* (HIP).

8. Pihak Kementerian juga menyediakan perkhidmatan sokongan dan bantuan teknikal termasuk perkhidmatan penyelidikan dan pembangunan (R&D) oleh Jabatan/ Agensi yang berkenaan.

9. Di samping itu, dari aspek pembangunan modal insan, tenaga kerja yang mahir dan profesional dilahirkan menerusi Program Latihan Kemahiran Pertanian Kebangsaan yang akan berkhidmat di dalam sektor pertanian.

10. Untuk pembiayaan pula, Agrobank menawarkan pelbagai produk untuk membantu agropreneur terutamanya untuk mengembangkan projek/ perniagaan yang berasaskan pertanian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HAJI AHMAD NAZLAN BIN IDRIS  
[ JERANTUT]**

**TARIKH : 31 OKTOBER 2019 (KHAMIS)**

**SOALAN NO. 8**

Minta **MENTERI PENDIDIKAN** menyatakan berapakah jumlah sebenar dana yang diperlukan PTPTN bagi membiayai pinjaman pendidikan pada setiap tahun dan jumlah pecahan dana yang disalurkan kepada pelajar di institusi pendidikan tinggi awan dan swasta.

**JAWAPAN**

Tuan Yang di-Pertua,

Untuk makluman Ahli Yang Berhormat, secara purata, PTPTN perlu menyediakan peruntukan sebanyak RM3.7 billion hingga RM4.3 billion setahun untuk membiayai pinjaman kepada 180,000 orang peminjam baharu dan 420,000 orang peminjam sedia ada.

Sehingga September 2019, PTPTN telah meluluskan pinjaman berjumlah RM72.1 bilion kepada 3.14 juta peminjam sehingga mereka tamat pengajian. Daripada jumlah tersebut, sebanyak RM36.5 bilion adalah untuk peminjam di institut pendidikan tinggi awam (IPTA) dan sebanyak RM35.6 bilion untuk peminjam di institut pendidikan tinggi swasta (IPTS).

Daripada jumlah kelulusan tersebut sebanyak RM57.7 bilion telah dikeluarkan kepada peminjam.

Sekian, terima kasih.

RJM 45

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI SHABUDIN BIN YAHAYA  
[TASEK GELUGOR]**

**TARIKH : 31 OKTOBER 2019 (KHAMIS)**

**SOALAN**

minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan adakah pihak Kementerian bercadang untuk mewujudkan satu pusat kajian atau pusat koordinasi khusus bagi memantau, mengkaji punca, kaedah pencegahan dan juga kaedah mengatasi masalah pencemaran sungai dan udara di kawasan yang berisiko tinggi terutamanya di kawasan perumahan yang berhampiran dengan lingkaran perindustrian.

**JAWAPAN**

Tuan Yang di-Pertua,

Untuk makluman Ahli Yang Berhormat,

Keperluan untuk mengadakan pusat kajian dan pusat koordinasi khusus adalah satu cadangan yang baik. Cadangan ini akan diteliti dan akan mengambil kira dapatan kajian bagi isu pencemaran di Pasir Gudang dan Sungai Kim Kim.

Buat masa ini pihak Kementerian menyelaraskan hasil kajian melalui Pusat Maklumat Sains dan Teknologi Malaysia (MASTIC) manakala pemantauan dan penguatkuasaan oleh Jabatan Alam Sekitar (JAS) bagi mengenalpasti punca dan pemantauan kualiti alam sekitar.

## NO. SOALAN : 9

Pihak Kementerian melalui Jabatan Alam Sekitar telah melaksanakan Program Pengawasan Kualiti Alam Sekitar, *Environmental Quality Monitoring Programme* (EQMP) untuk memantau tahap kualiti alam sekitar yang merangkumi udara, air sungai dan air laut. Data-data pengawasan kualiti alam sekitar ini dipantau dan diselaraskan melalui Pusat Data Alam Sekitar.

Manakala, bagi mencegah pencemaran, kerjasama antara pihak Kementerian melalui JAS dengan agensi-agensi berkaitan sungai dan udara seperti kerajaan Negeri, Pihak Berkuasa Tempatan, Badan Kawal Selia Air Negeri dan agensi-agensi kerajaan lain untuk menangani dan mencegah pencemaran dari berlaku terutama di kawasan berisiko tinggi.

Dari segi perancangan jangka masa panjang untuk memantau tahap pencemaran udara, JAS akan mensyaratkan pihak industri supaya mengisytiharkan beban pelepasan ke udara, *declare emissions loading* secara dalam talian dan dihubungkan terus dengan sistem pemantauan JAS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI REEZAL MERICAN BIN  
NAINA MERICAN [KEPALA BATAS]**

**TARIKH : 31 OKTOBER 2019**

**SOALAN**

**Dato' Sri Reezal Merican Bin Naina Merican [ Kepala Batas ]** minta **MENTERI PERDAGANGAN ANTARABANGSA DAN INDUSTRI** menyatakan kemajuan inisiatif Regional Comprehensive Economic Partnership (RCEP) setakat hari ini.

**JAWAPAN**

Tuan Yang di-Pertua,

1. Perjanjian Perkongsian Komprehensif Ekonomi Serantau atau dengan izin, *Regional Comprehensive Economic Partnership* (RCEP) merupakan satu usaha negara-negara ASEAN mengukuhkan integrasi ekonomi dan meningkatkan fasilitasi perdagangan intra-ASEAN dan juga dengan rakan-rakan dialog ASEAN iaitu China, Jepun, Korea, Australia, New Zealand and India.

2. Sejak rundingan dimulakan pada bulan Mei 2013 sehingga September 2019, sebanyak 28 pusingan rundingan telah diadakan dan sehingga kini, rundingan RCEP telah berjaya memuktamadkan 11 bab atau *Working Groups*, dengan izin iaitu:

- i. kerjasama ekonomi dan teknikal (ECOTECH);
- ii. perusahaan kecil dan sederhana (SME);

- iii. prosedur kastam dan fasilitasi perdagangan (CPTF)
- iv. *Institutional Provisions*;
- v. Kumpulan Kerja *standards, technical regulations and conformity assessment procedures* (STRACAP), dengan izin;
- vi. *sanitary and phytosanitary* (SPS), dengan izin;
- vii. perolehan kerajaan (GP) yang tidak melibatkan akses pasaran dan hanya bertujuan untuk berkongsi maklumat dan ketelusan;
- viii. Perkhidmatan Telekomunikasi (TEL);
- ix. Hak Harta Intelek (IPR);
- x. Isu Undang-Undang dan Institusi (LII), dan
- xi. Perdagangan Barangan (TIG),

Tuan Yang di-Pertua,

3. RCEP dapat memberi banyak manfaat kepada Malaysia. Antara faedah yang boleh saya nyatakan di sini adalah peraturan-peraturan dan prosedur yang berbeza di bawah setiap FTA ASEAN dapat diselaraskan dengan lebih teratur di bawah RCEP. Sektor swasta berpandangan bahawa penyelarasan prosedur dibawah RCEP adalah penting kerana perbezaan prosedur akan menyebabkan kerumitan perdagangan memandangkan mereka perlu mengikut prosedur yang berlainan bagi setiap FTA ASEAN. Perbezaan prosedur juga melibatkan kos tambahan dan masa yang lebih panjang dalam urusan perniagaan.

4. Selain itu, RCEP menyediakan peluang untuk memperoleh bahan mentah yang berkualiti pada harga yang lebih murah dari pelbagai sumber negara ahli RCEP yang boleh digunakan dalam perkiraan bagi

pematuhan kepada Peraturan Tempasal atau dengan izin, *Rules of Origin* (ROO). ROO merupakan kaedah yang digunakan bagi menentukan produk yang dihasilkan dapat menikmati tarif berkeutamaan di bawah RCEP. Hal ini penting untuk meningkatkan aktiviti pengeluaran dilaksanakan dalam negara-negara RCEP.

5. RCEP juga dapat membantu integrasi syarikat-syarikat di rantau ini dalam rangkaian nilai global (*global supply chain*) yang merupakan satu keperluan bagi syarikat-syarikat dirantau ini untuk lebih berdaya saing di peringkat antarabangsa, dan seterusnya berkembang menjadi syarikat bertaraf global (*global players*);

6. Seterusnya RCEP memberi peluang bagi Malaysia dan negara-negara ASEAN lain untuk meningkatkan eksport barangan dan perkhidmatan ke pasaran yang besar di Republik Rakyat China dan India. Sehingga kini belum ada sebarang perjanjian perdagangan bebas yang menghubungkan kedua-dua negara besar ini kecuali RCEP.

7. Akhir sekali, Malaysia juga akan menikmati akses dan liberalisasi pasaran yang lebih baik berbanding dengan komitmen yang sedia ada di bawah kerangka FTA ASEAN. Bagi Malaysia, ini adalah amat penting kerana masih terdapat peluang pasaran eksport yang masih belum diterokai sepenuhnya oleh peniaga-peniaga Malaysia.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LARRY SOON @ LARRY SNG WEI  
SHIEN [ JULAU ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan apakah usaha yang dilaksanakan oleh Kementerian untuk meningkatkan peranan kawasan luar bandar terutama sekali di Sabah dan Sarawak sebagai hab keselamatan makanan negara.

**JAWAPAN**

Tuan Yang Dipertua,

1. Daripada lapan juta hektar tanah pertanian dalam negara, sektor agromakanan hanya meliputi 0.75% daripada jumlah tersebut. Kebanyakan tanah pertanian ini terletak di kawasan luar bandar berbanding dengan kawasan bandar. Sehubungan itu, kawasan luar bandar berperanan besar sebagai pembekal komoditi agromakanan utama negara. Berbekalkan kepada peratusan kawasan luar bandar yang tinggi, Negeri Sabah dan Sarawak boleh memainkan peranan yang lebih aktif sebagai pengeluar utama komoditi agromakanan negara.

2. Bagi tahun 2018 sumbangan negeri Sarawak kepada KDNK sektor pertanian negara adalah tertinggi iaitu pada kadar 16.5 %, manakala negeri Sabah pada kedudukan ketiga dengan kadar 13.8 %. Kedua-dua negeri ini juga merupakan di antara pengeluar utama komoditi agromakanan seperti tanaman industri (seperti kopi, teh, cendawan dan rumbia/ pokok sagu), tanaman kontan, ternakan ayam dan babi serta perikanan pantai dan laut dalam.

3. Berdasarkan kepada statistik ini, Kerajaan akan terus meningkatkan peranan negeri Sabah dan Sarawak dalam menjamin bekalan makanan negara di masa hadapan menerusi pelbagai inisiatif pembangunan seperti berikut:

- I. Membangunkan pusat pengumpulan dan pengedaran seperti Pusat Pengumpulan Ladang (PPL) yang terletak sama ada di dalam atau berhampiran kawasan pengeluaran dengan menyediakan kemudahan infrastruktur bagi mengumpul dan menyediakan produk sebelum dipasarkan;
- II. Menggalakkan petani menceburi pelbagai projek agromakanan yang bernilai tinggi seperti seperti durian, madu kelulut, cendawan, herba akuakultur, rumpai laut dan sarang burung walit;
- III. Melantik golongan petani sebagai usahawan pemasar di mana golongan petani atau anak-anak mereka digalakkan untuk memasarkan sendiri produk-produk keluaran mereka dengan menggunakan medium ICT serta menerokai industri hiliran seperti menjadi usahawan industri asas tani;

## SOALAN NO : 11

- IV. Menggalakkan penyertaan golongan belia luar bandar melalui Program Agropreneur Muda supaya menceburi bidang pertanian moden dan menceburi sektor agropelancongan di mana kawasan luar bandar mempunyai daya tarikan tersendiri kepada masyarakat bandar dan pelancong asing;
- V. Melaksanakan pembangunan dua Kawasan Pembangunan Pertanian Bersepadu (IADA) di Batang Lupar di Sarawak dan Kota Belud di Sabah sebagai jelapang padi negara yang baharu;
- VI. Meningkatkan pengeluaran dalam sektor perikanan menerusi pengukuhan pengurusan perikanan tangkapan, menaiktaraf infrastruktur dan prasarana pendaratan ikan, menguatkuasakan Pemantauan, Kawalan dan Pengawasan (MCS) dan memperkasa industri akuakultur;
- VII. Meningkatkan pengeluaran sayur-sayuran menerusi pelbagai inisiatif penanaman seperti peluasan kawasan tanaman, penggunaan teknologi pertanian moden dan sebagainya; dan
- VIII. Melaksanakan sebuah Lembah Tenusu termasuk di Negeri Sabah dengan mensasarkan tambahan susu segar sebanyak 20 juta liter dalam tempoh lima tahun; dan
- IX. Menyokong pelaksanaan dasar negeri Sabah dan Sarawak dalam pembangunan agromakanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN** : **LISAN**

**DARIPADA** : **TUAN SHAHARIZUKIRNAIN BIN  
ABD. KADIR [ SETIU ]**

**TARIKH** : **31 OKTOBER 2019 (KHAMIS)**

**SOALAN**

minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan kadar peratusan teknologi hijau diterima pakai dalam keempat-empat sektor iaitu pengangkutan, pembangunan, tenaga serta air dan pengurusan sisa dan usaha yang dilakukan bagi mencapai Dasar Teknologi Hijau Negara.

**JAWAPAN**

Tuan Yang di-Pertua,

Untuk makluman Ahli Yang Berhormat,

1. Di bawah Dasar Teknologi Hijau Negara, Teknologi Hijau merujuk kepada produk, peralatan atau sistem yang memelihara alam sekitar dan memberi perhatian kepada kriteria seperti meminimumkan degradasi kualiti persekitaran, mempunyai pembebasan gas rumah hijau yang rendah atau sifar, selamat untuk digunakan, menyediakan persekitaran sihat dan lebih baik untuk semua hidupan, menjimatkan tenaga dan sumber asli, serta menggalakkan sumber yang boleh diperbaharui.
2. Bagi sektor pengangkutan, peratusan penggunaan teknologi hijau adalah seperti yang berikut:

## NO. SOALAN : 12

- (a) Jumlah keseluruhan untuk sektor pengangkutan kenderaan *Battery Electric Vehicle* (BEV) dan hybrid ialah sebanyak 65,739 buah. Daripada jumlah itu, 97% atau 63,936 unit merupakan kenderaan jenis hybrid dan lain-lain, manakala 3% atau 1803 unit ialah jenis BEV.
  - (b) Di bawah Skim Pembiayaan Teknologi Hijau (GTFS 1.0), 1% atau 5 projek daripada projek yang dibiayai adalah di bawah sektor pengangkutan. Jumlah pembiayaan untuk sektor pengangkutan ialah sebanyak RM25,230,000.
  - (c) Program MyHIJAU mencatatkan sebanyak 27 produk dan perkhidmatan menjadikan produk dan perkhidmatan pengangkutan hanya meliputi 1% dari jumlah 4,455 produk dan perkhidmatan.
3. Bagi sektor pembangunan, pencapaiannya adalah seperti yang berikut:
- (a) Di bawah Skim Pembiayaan Teknologi Hijau (GTFS 1.0), sebanyak 1% atau 3 projek di bawah sektor bangunan diluluskan iaitu bersamaan RM31,400,052 pembiayaan yang telah diluluskan.
  - (b) Di bawah program MyHIJAU, 16% atau sejumlah 691 produk dan perkhidmatan telah didaftarkan di dalam direktori MyHIJAU dari tahun 2015 hingga 2019, manakala 2% atau sejumlah 48 produk telah menerima pensijilan dari MyHIJAU pada 2019.
  - (c) Sebanyak 5% iaitu 3 projek di bawah kategori Green Investment Tax Allowance (GITA) Projek, manakala 8 projek dibawah kategori Green Income Tax Exemption (GITE) Services. Jumlah keseluruhan projek di bawah sektor pembangunan ialah sebanyak 11 projek pada 2019.
4. Bagi sektor tenaga:

## NO. SOALAN : 12

- (a) Sebanyak 85% atau 263 projek yang telah diluluskan pembiayaan dibawah sektor tenaga termasuk Kecekapan Tenaga dan Tenaga diperbaharu (EE dan RE) di bawah skim GTFS 1.0 dari tahun 2010 – 2017. Kesemua 29 projek atau 100% yang telah mendapat kelulusan GTFS2.0 pada tahun 2019 adalah di bawah sektor tenaga iaitu Tenaga diperbaharu (RE).
- (b) Bagi program MyHijau, sebanyak 59% atau 2646 produk dan perkhidmatan di bawah kategori Tenaga disenaraikan di dalam Direktori MyHijau pada 2015-2019. Manakala 80% atau 2186 produk di bawah kategori Tenaga telah tersenarai dalam Program Pensijilan MyHijau Mark pada tahun 2019.
- (c) Di bawah program GITA/GITE, 13% atau 28 projek di bawah EE, 36% atau 75 projek di bawah RE, 51% atau 106 projek lain-lain adalah antara 210 projek yang telah menerima insentif di bawah GITA Projek, 66% atau 4 projek telah menerima insentif dibawah GITA Aset, 25% atau 5 perkhidmatan EE dan 75% atau 15 perkhidmatan RE yang telah menerima pengecualian tax di bawah GITE pada 2016 hingga 2019.

### 5. Bagi sektor air:

- (a) Sebanyak 14% atau 45 projek di bawah sektor air telah diluluskan pembiayaan di GTFS 1.0 pada 2010 hingga 2017.
- (b) 1% atau 62 produk dan perkhidmatan yang didaftarkan di bawah sektor air di dalam Direktori MyHijau pada 2015 hingga 2019. Sebanyak 5% atau 128 produk di bawah sektor air telah menerima pensijilan produk eko di bawah MyHijau Mark pada 2019.

### 6. Bagi sektor pengurusan sisa:

- (a) Sebanyak 13% atau 45 projek telah diluluskan pembiayaan GTFS 1.0 di bawah sektor pengurusan sisa dan air pada 2010 hingga 2017.

**NO. SOALAN : 12**

- (b) 23% atau 1029 produk dan perkhidmatan didaftarkan di dalam MyHijau Direktori pada tahun 2015 hingga 2019, yang mana 13% atau 365 produk telah menerima pensijilan produk eko di bawah Myhijau Mark pada tahun 2019

7. Kemajuan yang signifikan dan peningkatan aplikasi teknologi hijau di dalam keempat-empat sektor ini dinilai daripada pelaksanaan program dan inisiatif yang dijalankan oleh Kementerian melalui Malaysian Green Technology Corporation (MGTC) sebagai agensi pelaksana bagi inisiatif-inisiatif tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN EMPAT BELAS**

---

**PERTANYAAN : JAWAB LISAN**

**DARIPADA : YB DATO' JOHARI ABDUL (SUNGAI PETANI)**

**TARIKH : 31 OKTOBER 2019 (KHAMIS)**

**SOALAN**

**DATO' JOHARI BIN ABDUL [ SUNGAI PETANI ]** minta **MENTERI DALAM NEGERI** menyatakan apakah Kerajaan akan mengambil tindakan kepada pengguna sosial media yang menggunakan media ini untuk menyebabkan fitnah dan mengapi-apikan sentimen perkauman yang boleh mengakibatkan kehancuran keharmonian kaum dan membahayakan negara.

**JAWAPAN**

Tuan Yang di-Pertua,

Terima kasih Yang Berhormat Sungai Petani. Sebenarnya soalan ini dia ada berkait sedikit terdapat dengan soalan yang saya jawab pada soalan nombor enam sebentar tadi, cuma ada sedikit tambahan berkenaan dengan unsur fitnah. Kementerian Dalam Negeri melalui penguatkuasaan pihak polis akan mengambil tindakan tegas dengan melakukan tangkapan dan pendakwaan terhadap mana-mana individu yang menyalahgunakan media sosial untuk menyebarkan fitnah dan mengapi-apikan sentimen perkauman.

Tindakan penguatkuasaan sedemikian dilaksanakan berdasarkan kepada peruntukan undang-undang yang sedia ada seperti Akta Hasutan 1948, Kanun Keseksaan ataupun Akta Komunikasi dan Multimedia 1998. Pihak polis juga akan terus melakukan pemantauan ke atas penyebaran



### **SOALAN NO : 13**

maklumat yang disiarkan di media-media sosial. Laporan dan tindakan segera akan diambil sekiranya terdapat kes-kes yang melibatkan sensitiviti kaum dan agama. Ini kerana isu-isu tersebut jika tidak dibendung, boleh menjejaskan ketenteraman dan keharmonian yang dinikmati oleh rakyat Malaysia selama ini.

Bagi menangani penyalahgunaan media sosial ini, pihak polis telah menubuhkan taskforce yang akan menjalinkan kerjasama yang erat dengan pihak-pihak seperti bank, syarikat telekomunikasi, Suruhanjaya Komunikasi dan Multimedia dan juga agensi-agensi berkaitan dari luar negara termasuk pengendali platform atas talian ataupun media sosial seperti Google dan Facebook. Kerjasama ini akan membolehkan pihak polis meningkatkan lagi keberkesanan pemantauan dan siasatan terhadap penyalahgunaan media sosial termasuk mengenal pasti pelaku-pelaku yang terbabit untuk didakwa di mahkamah.

Sebagai tambahan kepada soalan Yang Berhormat Bera tadi sama ada JAKIM dan juga KDN mengadakan kerjasama, sebenarnya sebanyak 34 kes yang saya sebutkan itu adalah kes-kes yang kita telah pun kenal pasti adalah sumber kepada penyebaran kes berkenaan dengan isu agama tadi. Akan tetapi yang diterima oleh JAKIM sebanyak 5,000 kes itu merupakan kes-kes yang mana mesej-mesej di-forward. Maklumlah sekarang ini, terlalu banyak mesej yang di-forward yang bukan daripada source. Jadi, JAKIM dan Kementerian Dalam Negeri bekerjasama dari segi faktor itu bilamana source yang kita peroleh hasil daripada 5,000 yang tadi, itulah yang kita ambil tindakan.

Sebagai tambahan juga Tuan Yang di-Pertua, tadi sebut sebanyak 34 kes iaitu berkenaan sentimen isu agama tetapi jika ditambah dengan fitnah, total kes yang telah diambil adalah sebanyak 62 kes di mana melibatkan isu agama sebanyak 34 kes, melibatkan isu raja sebanyak 32 kes dan isu kaum sebanyak 30 kes. Ini yang disiasat bagi tahun ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DR. NIK MUHAMMAD ZAWAWI BIN HAJI  
SALLEH [ PASIR PUTEH ]**

**TARIKH : 31 OKTOBER 2019 (KHAMIS)**

**SOALAN NO. 14**

Minta **MENTERI PENDIDIKAN** menyatakan adakah pihak Kerajaan bercadang untuk menubuhkan sebuah agensi persekutuan bagi memandu agenda TVET dan menyelaras keseluruhan institusi TVET yang berada di pelbagai Kementerian dan Kerajaan negeri ketika ini.

**JAWAPAN**

Tuan Yang di-Pertua,

Kementerian Pendidikan Malaysia (KPM) amat komited untuk menjadikan bidang teknikal dan vokasional (TVET) sebagai pilihan utama seiring dengan matlamat melahirkan 35 peratus pekerja mahir dalam kalangan tenaga kerja negara menjelang 2020. Ini kerana semua program pemerkasaan TVET oleh KPM telah dizahirkan dalam Pelan Pembangunan Pendidikan Malaysia 2015-2025 (Pendidikan Tinggi) (PPPM (PT)).

Mesyuarat Jemaah Menteri yang bersidang pada 14 Ogos 2019 telah memberi mandat untuk penubuhan Jawatankuasa Kabinet Pemerkasaan TVET (JKKPTVET) bagi memperkasa sistem dan institusi TVET merentasi sembilan kementerian. Tujuan JKKPTVET berperanan penting sebagai badan penasihat kepada kerajaan dalam hal-hal berkaitan pembangunan aliran TVET negara. Jawatankuasa Kabinet Pemerkasaan TVET merupakan permulaan kepada penubuhan satu badan penyelaras bagi semua kementerian. Cadangan *“Kajian Pembangunan Pelan Induk Kebangsaan Latihan Teknikal dan Vokasional (TVET) Ke Arah Negara Maju”* yang disediakan oleh Institut Maklumat dan Analisis Pasaran Buruh (ILMIA) pada Oktober 2018 juga menyatakan akan keperluan untuk mewujudkan satu badan bagi menyelaras TVET negara.

Walau bagaimanapun, cadangan menubuhkan sebuah agensi persekutuan atau satu badan penyelaras masih lagi dalam peringkat perbincangan. Satu kajian akan dilaksanakan dengan lebih terperinci sebelum badan ini diwujudkan.

Sekian, terima kasih.

RJM 60(ii)

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WILLIAM LEONG JEE KEEN  
[SELAYANG]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan sama ada undang-undang baru berkaitan benih yang selaras dengan perjanjian UPOV akan menyusahkan petani tempatan dengan wujudnya sekatan-sekatan terhadap perkongsian benih dengan petani lain, menaikkan harga benih dan meningkatkan kebergantungan pada syarikat benih gergasi.

**JAWAPAN**

Yang di-Pertua,

1. Kementerian Pertanian dan Industri Asas Tani sedang membangunkan undang-undang berkaitan benih melalui :

- i. **Rang Undang-undang (RUU) Kualiti Benih Tanaman** yang bertujuan melindungi hak petani dengan memastikan benih-benih tanaman yang berada di pasaran adalah berkualiti, mengikut piawaian yang ditetapkan dan mampu memberikan pulangan hasil yang baik kepada petani; dan
- ii. **RUU Perlindungan Varieti Baru Tumbuhan (PVBT)** yang bertujuan :
  - a. mengelak pertindihan kuasa kepada Akta-akta sedia ada seperti Akta Akses Kepada Sumber Biologi Dan Perkongsian Faedah 2017 (Akta 795) dan Akta Biokeselamatan 2007 (Akta 678);
  - b. mempercepatkan proses pemberian hak pembiak baka
  - c. melindungi varieti baru yang telah didaftarkan;
  - d. mengiktiraf hasil usaha pembiak baka yang membangunkan varieti baru; dan
  - e. menambah baik hak-hak petani selaras dengan Konvensyen International Union For The Protection of New Varieties of Plants (UPOV) 1991.

2. Dalam konteks ini, RUU Perlindungan Varieti Baru Tumbuhan adalah selaras dengan Konvensyen UPOV 1991 di mana 'biopiracy' tidak berlaku. Semua pembiak baka dalam negara dibenarkan untuk menggunakan varieti-varieti yang dilindungi bagi pengeluaran baka-baka baru. UPOV yang merupakan badan antara kerajaan yang diwujudkan setelah *UPOV Convention* 1961 di Paris bermatlamat

untuk memajukan sistem perlindungan varieti baru tumbuhan dan menggalakkan pembangunan varieti tumbuhan baru yang memberi manfaat kepada masyarakat.

3. Skop RUU Perlindungan Varieti Baru Tumbuhan ini hanya melibatkan varieti baru tanaman yang dilindungi di bawah RUU ini dan tidak menyentuh varieti-verieti sedia ada dalam negara. Oleh itu, petani tidak terikat dengan RUU ini bagi benih tanaman yang tidak dilindungi.

4. Kedua-dua RUU ini membenarkan petani kecil untuk menghasilkan, menyimpan dan bertukar bahan tanaman sesama petani dari varieti yang dilindungi tanpa tujuan komersil mengikut definisi dan syarat yang telah ditetapkan di bawah RUU ini. RUU Perlindungan Varieti Baru Tumbuhan pula hanya melibatkan varieti baru tumbuhan yang didaftarkan dan tidak menyentuh varieti-verieti sedia ada.

5. RUU Perlindungan Varieti Baru Tumbuhan memberikan hak yang sama kepada pembiak baka sama ada petani, profesional, usahawan atau syarikat dalam mendaftarkan varieti baru yang dihasilkan. Petani akan mempunyai banyak pilihan dalam memilih benih-benih dari pelbagai varieti baru yang dilindungi dan tidak dilindungi atau varieti sedia ada yang dikeluarkan oleh mana-mana pihak sama ada individu atau syarikat kecil mahupun syarikat gergasi. Ini membuktikan tiada kebergantungan atau pengawalan oleh syarikat-syarikat gergasi akan berlaku ke atas mana-mana individu yang menjalankan aktiviti pembiakbakaan.

6. Walaupun peningkatan harga benih dijangka akan berlaku kesan daripada kos yang tinggi dalam penghasilan varieti baru, tetapi petani masih mempunyai pilihan dari pelbagai varieti baru di pasaran di samping tiada sekatan untuk menggunakan varieti lama kerana ianya tidak terikat dan tidak dilindungi di bawah RUU dan Akta yang sedang dibangunkan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK DR. JEFFREY GAPARI KITINGAN  
[ KENINGAU ]**

**TARIKH : 31 OKTOBER 2019 (KHAMIS)**

**SOALAN NO. 16**

Minta **MENTERI PENDIDIKAN** menyatakan bilakah Kementerian akan mengeluarkan buku-buku teks Sejarah sekolah yang merujuk kepada fakta-fakta sejarah yang betul bahawa Persekutuan Malaya dengan 11 negeri di Semenanjung mencapai kemerdekaan pada 31 Ogos 1957 dan bahawa Persekutuan Malaysia dibentuk oleh Persekutuan Malaya, Sabah, Sarawak dan Singapura (yang kemudian berpisah pada 1965) sebagai rakan kongsi sama taraf melalui Perjanjian Malaysia pada 16 September 1963.

**JAWAPAN**

Tuan Yang di-Pertua,

Kementerian Pendidikan Malaysia (KPM) ingin memaklumkan bahawa fakta berkaitan Perjanjian Malaysia (MA63) sememangnya telah dimasukkan dalam buku teks Sejarah KPM. Fakta-fakta tersebut adalah merupakan fakta yang tepat dan sahih serta telah disahkan oleh Panel Pakar Rujuk Kurikulum Sejarah dan Buku Teks Sejarah sebelum buku teks diterbitkan. Untuk makluman, Perjanjian Malaysia diajarkan di bawah tajuk Pembentukan Malaysia. KPM berpandangan bahawa peristiwa bersejarah seumpama ini perlu dipelajari oleh murid sama ada di peringkat sekolah rendah mahupun di peringkat sekolah menengah. Penjelasan sejarah Pembentukan Malaysia dan Perjanjian Malaysia (MA63) telah dinyatakan mengikut aras dan tahap keupayaan murid.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' DR HAJI NOOR AZMI BIN GHAZALI  
[BAGAN SERAI]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan apakah peranan dan tindakan Lembaga Kebajikan Haiwan jika terdapat unsur-unsur penganiayaan dalam proses menangkap, mengangkut, mengurung serta melupuskan anjing-anjing yang dilakukan oleh PBT.

**JAWAPAN**

Yang di-Pertua,

1. Lembaga Kebajikan Haiwan adalah suatu badan yang ditubuhkan di bawah peruntukan Seksyen 3 Akta Kebajikan Haiwan 2015 [Akta 772] yang bertujuan untuk mengawalselia tadbir urus penguatkuasaan Akta Kebajikan Haiwan 2015. Lembaga ini dipengerusikan oleh Ketua Pengarah Perkhidmatan Veterinar dan dianggotai oleh ahli-ahli daripada pelbagai Kementerian/Jabatan yang berkepentingan.

2. Mengikut Akta Kebajikan Haiwan 2015 di bawah Seksyen 4 (1), Lembaga Kebajikan Haiwan hendaklah mempunyai fungsi-fungsi seperti yang berikut: -



- i. untuk memantau kerja-kerja persatuan atau badan yang ditubuhkan bagi maksud mencegah trauma, kesakitan atau penderitaan kepada haiwan;
- ii. untuk memantau kerja-kerja bagi perlindungan haiwan, termasuklah haiwan dalam rumah penyelamat, tempat perlindungan haiwan atau kawasan perlindungan;
- iii. untuk memantau keadaan tempat haiwan itu lemah atau memerlukan perlindungan;
- iv. untuk memberikan pendidikan berhubung dengan layanan berperikemanusiaan kepada haiwan dan untuk menggalakkan pembentukan pendapat umum berhubung dengan tindakan mengakibatkan trauma, kesakitan atau penderitaan kepada haiwan;
- v. untuk mempromosikan kebajikan haiwan melalui ceramah, buku, poster, pameran sinematografi, dan lain-lain; dan
- vi. untuk mentadbirkan, menguatkuasakan dan memastikan pelaksanaan Akta Kebajikan Haiwan 2015 yang berkesan.

3. Kementerian Pertanian dan Industri Asas Tani melalui Jabatan Perkhidmatan Veterinar telah menyediakan garis panduan dan tatacara operasi piawai penangkapan dan pelupusan anjing terbiar di kawasan PBT untuk dilaksanakan di kawasan PBT, Semenanjung Malaysia. Bagi negeri Sabah dan Sarawak penggunaan garis panduan tersebut adalah tertakluk kepada penerimaan Pihak Berkuasa Negeri sebagaimana yang dipersetujui.

4. Sehubungan dengan itu, sekiranya terdapat bukti yang jelas unsur-unsur penganiayaan semasa menangkap, mengangkut, mengurung dan melupuskan anjing-anjing liar berkeliaran yang dilakukan oleh PBT, pihak atau individu boleh didakwa di bawah Akta Kebajikan Haiwan 2015. Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN MOHD SHAHAR BIN ABDULLAH  
[ PAYA BESAR ]**

**TARIKH : 31 OKTOBER 2019 (KHAMIS)**

**SOALAN NO. 18**

Minta **MENTERI PENDIDIKAN** menyatakan:

- (a) status terkini dan hasil dapatan Kertas Konsultasi Rakyat (KKR) dan bilakah Kementerian akan membentangkannya di dalam Parlimen; dan
- (b) senarai Badan Bukan Kerajaan (NGO), wakil rakyat, individu berprofil tinggi, syarikat swasta, dan lain-lain pihak yang terlibat dalam memberi cadangan tersebut.

**JAWAPAN**

Tuan Yang di-Pertua,

- a) Untuk Makluman Ahli Yang Berhormat, PTPTN telah mengenalpasti mekanisme terbaharu bayaran balik pinjaman sepertimana yang telah disyorkan hasil daripada sesi konsultasi rakyat. mekanisme baharu ini akan diumumkan selepas mendapat kelulusan Jemaah Menteri.
- b) Sebanyak 139 pihak terlibat dalam memberi cadangan yang terdiri daripada agensi kerajaan, Badan Bukan Kerajaan (NGO), wakil rakyat, individu, syarikat swasta, dan lain-lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN KASTHURIRAANI A/P PATTO  
[ BATU KAWAN ]**

**TARIKH : 31 OKTOBER 2019 (KHAMIS)**

**SOALAN NO. 19**

Minta **MENTERI PENDIDIKAN** menyatakan kajian untuk meminda Akta Pendidikan untuk mewajibkan pelajar bersekolah sehingga peringkat SPM dan nyatakan pecahan pelajar yang tercicir (school drop out) di antara umur 13 hingga 17 tahun sehingga kini dan apakah pelan Kementerian untuk memastikan akses jarak dekat dan selamat untuk semua pelajar terutama di kawasan pedalaman dan luar bandar.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah menyediakan draf Draf Rang Undang-Undang (RUU) Pendidikan (Pindaan) – Pendidikan Wajib 11 Tahun kepada murid-murid bermula di sekolah rendah sehingga tamat sekolah menengah di peringkat Sijil Pelajaran Malaysia (SPM). Walau bagaimanapun, draf RUU tersebut hanya akan dibentangkan di Parlimen setelah Laporan Jawatankuasa Kajian Dasar Pendidikan selesai diteliti dan diambil kira oleh KPM.

Berhubung isu keciciran murid, statistik murid cicir di Malaysia menunjukkan trend yang menurun bagi peringkat sekolah menengah iaitu 1.50 peratus pada tahun 2016 berbanding 1.21 peratus pada tahun 2018. Bagi tahun 2018 sebanyak 0.29 peratus murid Tingkatan 1 pada tahun 2017 yang tidak meneruskan persekolahan ke Tingkatan 2.

## **NO. SOALAN: 19**

Sementara murid Tingkatan 2 pada tahun 2017 yang tidak meneruskan persekolahan ke Tingkatan 3 pada tahun 2018 adalah 0.53 peratus. Murid Tingkatan 3 pada tahun 2017 yang tidak meneruskan persekolahan ke Tingkatan 4 pada tahun 2018 adalah sebanyak 1.01 peratus. Walau bagaimanapun tiada murid yang cicir daripada Tingkatan 4 pada tahun 2017 dan mereka meneruskan persekolahan ke Tingkatan 5 pada tahun 2018.

Pelbagai usaha yang telah dilaksanakan oleh KPM bagi membendung isu keciciran murid. Inisiatif Peningkatan Akses daripada Peringkat Prasekolah hingga Menengah Atas diwujudkan dengan tujuan meningkatkan enrolmen murid pelbagai peringkat persekolahan serta menangani masalah keciciran di sekolah. Inisiatif ini terdapat dalam Pelan Pembangunan Pendidikan Malaysia (PPPM) 2013-2025.

Pelbagai langkah telah diambil bagi mengurangkan kadar keciciran melibatkan sebelum penempatan murid dilaksanakan sehinggalah murid mendapat pendidikan di sekolah. KPM sedaya upaya berusaha untuk memastikan semua murid mendapat kemudahan akses jarak dekat dan selamat untuk ke sekolah. Sehubungan itu, KPM telah menggariskan satu Garis Panduan Penempatan Murid ke sekolah berdasarkan kriteria seperti berikut:

1. Alamat rumah dan lokasi ibu, bapa atau penjaga;
2. Murid Prasekolah sekolah berkenaan;
3. Berhampiran tempat kerja ibu, bapa dan penjaga;
4. Staf sekolah (guru atau kakitangan sekolah), dan
5. Terdapat adik-beradik yang bersekolah di sekolah tersebut

Antara usaha yang dilaksanakan oleh KPM bagi mengurangkan kadar keciciran termasuk menambah baik kemudahan asas, memperbanyakkan program motivasi, meningkatkan kesedaran ibu bapa, mewujudkan dan memperluas program bantuan seperti menyediakan Biasiswa Kecil Persekutuan, Rancangan Makanan Tambahan dan Kumpulan Wang Amanah Pelajar Miskin (KWAPM). KPM juga turut menyediakan pelbagai bantuan lain seperti pemberian buku teks secara percuma, Rancangan Makanan Tambahan (RMT), Program Susu

## **NO. SOALAN: 19**

Sekolah, dan menyediakan khidmat guru kaunselor dan guru pemulihan untuk meningkatkan minat murid untuk meneruskan persekolahan. Selain itu Kerajaan turut menyediakan Sekolah Model Khas Komprehensif 9 (K9) dan pembinaan asrama sekolah supaya semua kanak-kanak dapat kekal bersekolah bagi murid di kawasan pedalaman dan luar bandar.

KPM juga telah menyediakan satu garis panduan bagi membantu murid-murid yang berisiko untuk cicir iaitu Garis Panduan Mengurus Murid Berisiko Cicir di Sekolah (GPMBC). GPMBC telah dikuatkuasakan pada 1 Jun 2018 ke semua sekolah kerajaan dan bantuan kerajaan. Pemantauan serta intervensi pihak sekolah dapat dijalankan kepada murid berisiko cicir agar mereka kekal bersekolah hingga tamat Tingkatan 5. GPMBC ini juga mempunyai objektif bagi memastikan pemantauan murid khususnya murid berisiko cicir dapat dibuat oleh pihak Jabatan Pendidikan Negeri (JPN), Pejabat Pendidikan Daerah (PPD) dan sekolah secara berterusan.

Terkini, satu program rintis bagi Program Sifar Murid Cicir (PSMC) telah dijalankan bagi satu JPN dan lima PPD. Objektif program ini ialah memberi intervensi berfokus bagi membantu murid cicir untuk kembali bersekolah. Dapatan rintis tahun 2018, PSMC ini berjaya mengembalikan 26.1 peratus murid peringkat sekolah menengah dan 25.7 peratus murid peringkat sekolah rendah untuk kembali meneruskan persekolahan mereka. PSMC ini akan terus diperluaskan ke semua PPD sebagai usaha KPM untuk membendung masalah keciciran dalam kalangan murid sekolah.

Sekian, terima kasih.

**PEMBERITAHUAN PERTANYAAN JAWAB LISAN  
MESYUARAT KETIGA, PENGGAL KEDUA,  
PARLIMEN EMPAT BELAS DEWAN RAKYAT**

---

**PERTANYAAN : JAWAB LISAN**

**DARIPADA : YB TAN SRI NOH BIN OMAR (TANJONG  
KARANG)**

**TARIKH : 31 OKTOBER 2019**

**SOALAN**

**Tan Sri Noh bin Haji Omar [ Tanjong Karang ]** minta **MENTERI DALAM NEGERI** menyatakan jumlah warga asing yang telah berjaya mendapat status warganegara dari Mei 2018 hingga September 2019 mengikut negeri dan negara asal mereka.

**JAWAPAN**

Tuan Yang Di-Pertua,

Berdasarkan rekod Jabatan Pendaftaran Negara (JPN) dari bulan Mei 2018 hingga 15 September 2019, sebanyak 4,350 pemohon dianugerahkan kewarganegaraan Malaysia. Daripada jumlah tersebut, perincian mengikut lima (5) kaum dan Negara asal tertinggi pemohon adalah seperti mana berikut:-

- i. Indonesia: 1,476 pemohon;
- ii. India: 446 pemohon;
- iii. Thailand: 306 pemohon;
- iv. Filipina: 171 pemohon; dan
- v. Vietnam: 102 pemohon.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN JUGAH ANAK MUYANG @ TAMBAT  
[ LUBOK ANTU ]**

**TARIKH : 31 OKTOBER 2019 (KHAMIS)**

**SOALAN NO. 21**

Minta **MENTERI PENDIDIKAN** menyatakan apakah status terkini permohonan membina satu blok [12 unit kelas] di SMK Engkilili, Lubok Antu, Sarawak yang dalam keadaan terdesak sekarang.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah mengemukakan permohonan awal bagi projek pembinaan gantian penuh Sekolah Pusat Tingkatan 6 merangkumi 4 bilik darjah, asrama berkapasiti 200 murid, 4 unit rumah guru dan lain-lain kemudahan di SMK Engkilili, Lubok Antu, Sarawak dalam *Rolling Plan 2*, RMKe-11 Tahun 2017 dengan anggaran kos ketika itu berjumlah RM22.536 juta. Walau bagaimanapun, permohonan bagi projek tersebut tidak diluluskan oleh agensi pusat.

Sehubungan itu, pihak Jabatan Pendidikan Negeri (JPN) Sarawak boleh mengemukakan semula permohonan bagi projek tersebut sebagai satu keutamaan tinggi yang mendesak dalam pembidaan cadangan projek *Rolling Plan 1* RMKe-12 Tahun 2021. Walau bagaimanapun kelulusan permohonan adalah tertakluk kepada kelulusan agensi pusat dan kedudukan semasa kewangan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI HAJI FADILLAH BIN YUSOF  
[ PETRAJAYA ]**

**TARIKH : 31 OKTOBER 2019 (KHAMIS)**

**SOALAN NO. 22**

Minta **MENTERI PENDIDIKAN** menyatakan hala tuju pendidikan TVET dan adakah pendedahan diberikan kepada para pelajar yang berminat terutamanya mereka yang kurang menyerlah dalam bidang akademik akan peluang yang ada dalam bidang TVET.



**JAWAPAN**

Tuan Yang di-Pertua,

Kementerian Pendidikan Malaysia (KPM) telah melaksanakan Transformasi Pendidikan Vokasional (TPV) mulai tahun 2012 bagi mengangkat martabat pendidikan vokasional setaraf dengan pendidikan arus perdana. Melalui Pelan Pembangunan Pendidikan Malaysia (PPPM) 2013 - 2025, TPV diperhebat apabila diletakkan menjadi salah satu Aspirasi Sistem, iaitu akses kepada pendidikan berkualiti. Matlamat TPV adalah untuk melahirkan pelajar yang berkemahiran bagi keperluan industri di Negara kita. *Outcomes* TPV melalui kolej vokasional adalah melahirkan 70 peratus murid bekerja di industri, 20 peratus murid menyambung pengajian ke peringkat yang lebih tinggi dan 10 peratus untuk menjadi teknousahawan.

Selain itu, komitmen KPM dalam pemerkasaan pendidikan teknikal dan vokasional (TVET) dapat dilihat melalui perancangan yang termaktub dalam Pelan Pembangunan Pendidikan Malaysia 2015-2025 (Pendidikan Tinggi) (PPPM (PT)). Pelan ini juga bermatlamat menjadikan bidang teknikal dan vokasional (TVET) sebagai pilihan utama seiring dengan matlamat melahirkan 35 peratus pekerja mahir dalam kalangan tenaga kerja negara menjelang 2020.

Hala tuju pendidikan TVET diperkukuhkan lagi dengan Jemaah Menteri memberi mandat untuk penubuhan Jawatankuasa Kabinet Pemerkasaan TVET yang dipengerusikan oleh YB Menteri Pendidikan dan dianggotai oleh sembilan Kementerian lain yang menawarkan program TVET di Kementerian masing-masing. Pendidikan TVET di negara ini juga akan terus dimantapkan dengan penerimaan pelajar dari kolej vokasional dan aliran Kemahiran Malaysia untuk mengikuti pengajian di universiti teknikal melalui artikulasi dan akreditasi oleh Agensi Kelayakan Malaysia (MQA). Buat pertama kalinya pada bulan September 2019, pelajar dari Kolej Vokasional dan aliran Kemahiran Malaysia boleh melanjutkan pengajian di institusi pendidikan tinggi setelah kerangka artikulasi dan akreditasi dimantapkan oleh MQA dengan bantuan *Malaysian Technical University Network* (MTUN).

KPM sentiasa memastikan kualiti dalam perkhidmatan TVET menjangkau tahap standard yang ditetapkan oleh badan akreditasi melalui Agensi Kelayakan Malaysia (MQA), badan akreditasi dan profesional yang lain seperti Majlis Akreditasi Kejuruteraan Teknologi (ETAC) di bawah Lembaga Jurutera Malaysia, Malaysian Board of Technologist (MBOT), Lembaga Juruukur Tanah (LJT), Lembaga Arkitek Malaysia (LAM), *International Maritime Organisation* (IMO), *Asia Pacific Accreditation and Certification Commission* (APACC) dan sebagainya. Agensi-agensi ini telah menetapkan standard piawaian akreditasi bagi program dan institusi yang perlu dicapai dalam memastikan graduan yang dihasilkan benar-benar berkualiti.

Menyentuh mengenai pendedahan dan peluang kepada murid yang kurang menyerlah dalam bidang akademik, antara peluang yang disediakan oleh KPM kepada murid-murid yang berminat terhadap bidang TVET adalah seperti yang berikut:

**a. Program Diploma Vokasional Malaysia (DVM)**

Program DVM dilaksanakan di 85 buah Kolej Vokasional (KV) KPM dan 10 buah institusi latihan kemahiran swasta (ILKS) secara kaedah *buying places*. DVM ditawarkan kepada pelajar lepasan PT3 dan tempoh pengajian adalah 4 tahun 5 bulan. Pada dua tahun pertama pelajar melalui program sijil (pada usia 16-17 tahun). Setelah memenuhi syarat-syarat yang ditetapkan, pelajar dianugerahkan Sijil Vokasional Malaysia (SVM) dan layak meneruskan pengajian di peringkat diploma. Tempoh pengajian diploma adalah selama dua tahun pengajian dan lima bulan *On-the- Job Training* (OJT) di industri.

**b. Program Pendidikan Vokasional Menengah Atas (PVMA)**

PVMA merupakan program kemahiran yang ditawarkan kepada murid lepasan PT3 di 349 Sekolah Menengah Kebangsaan (SMK) dan Sekolah Menengah Pendidikan Khas Vokasional (SMPKV). Tempoh program ini adalah selama dua tahun dan selepas menjalani program ini, murid yang layak serta kompeten akan mendapat Sijil Pelajaran Malaysia (SPM) dan Sijil Kemahiran Malaysia (SKM) Tahap 2.

**c. Perantisan Industri Menengah Atas (PIMA)**

PIMA merupakan program yang berkonsepkan *Apprenticeship* dan ditawarkan kepada 124 buah sekolah menengah kebangsaan. Program ini ditawarkan kepada murid lepasan Pentaksiran Tingkatan 3 (PT3) yang mempunyai pencapaian rendah dalam akademik selama tempoh dua tahun. Di dalam tempoh seminggu pembelajaran, murid akan berada selama dua hari di sekolah untuk akademik dan tiga hari di industri untuk *hands-on learning*. Di akhir pengajian sekiranya layak murid akan mendapat Sijil Pelajaran Malaysia (SPM) dan sijil testimoni daripada industri.

Selain daripada itu, beberapa program seperti pameran pendidikan, program *outreach* dan program kolaborasi industri merupakan antara promosi pengambilan pelajar Politeknik dan Kolej Komuniti yang telah dijalankan bagi memberi pendedahan kepada pelajar.

Sekian, terima kasih.

RJM 46

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 31 OKTOBER 2019 (KHAMIS)**

**SOALAN NO. 23**

Minta **MENTERI PENDIDIKAN** menyatakan pelan perancangan Kementerian bagi meningkatkan mutu pendidikan Bahasa Inggeris di sekolah rendah dan sekolah menengah.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah dan sedang melaksanakan pelbagai usaha bagi meningkatkan kualiti pendidikan bahasa Inggeris dalam kalangan murid sekolah rendah dan sekolah menengah. Melalui usaha sama KPM dan *Cambridge English* (2016-2020), pelbagai perubahan secara sistematik dilaksanakan terhadap pendidikan bahasa Inggeris.

Antara usaha yang dilaksanakan melibatkan penjajaran kurikulum Bahasa Inggeris, pentaksiran, latihan guru dan bahan sumber diujarkannya kepada piawaian antarabangsa *Common European Framework of Reference for Languages* (CEFR). Usaha sama ini adalah berdasarkan Pelan Pembangunan Pendidikan Bahasa Inggeris yang dikenali sebagai *The Roadmap for English Language Education in Malaysia 2015–2025*. Pelan ini memperincikan perubahan dalam pendidikan Bahasa Inggeris pada peringkat prasekolah sehingga universiti termasuk pendidikan guru.

## NO. SOALAN: 23

Di samping itu, pelbagai program juga telah dilaksanakan oleh KPM bagi meningkatkan pendidikan bahasa Inggeris, antaranya ialah:

- a) Program *Fulbright English Teaching Assistant* (ETA) - program ini dilaksanakan di 100 buah sekolah luar bandar selama tiga (3) tahun bermula tahun 2018 hingga 2020 dengan penempatan *Fulbright Scholars* dari universiti di Amerika Syarikat sebagai pembantu guru. Sukarelawan ETA ini berperanan membantu guru melaksanakan pelbagai aktiviti pembelajaran Bahasa Inggeris di dalam dan di luar kelas.
- b) Program Peningkatan Kemahiran Bahasa Inggeris Sekolah (PPKBIS) – program ini bertujuan untuk meningkatkan pencapaian bahasa Inggeris di sekolah *hotspot*, iaitu sekolah yang mempunyai peratus kelulusan Bahasa Inggeris di bawah 77 peratus peringkat Sijil Pelajaran Malaysia. (SPM). Program melibatkan pengajaran Bahasa Inggeris melalui pendekatan pemulihan.
- c) *Highly Immersive Programme* (HIP) merupakan satu inisiatif untuk meluaskan penggunaan Bahasa Inggeris dalam kalangan murid serta mewujudkan persekitaran yang menyokong penggunaan BI termasuk aktiviti dalam kelas, luar kelas, kelas tambahan dan program *Outreach*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD JOHNIE BIN ZAWAWI [ IGAN ]**

**TARIKH : 31 OKTOBER 2019 (KHAMIS)**

**SOALAN NO. 24**

Minta **MENTERI PENDIDIKAN** menyatakan berapakah kos sebenar untuk membina baru SMK Matu, Mukah dan di manakah lokasinya serta bilakah projek berkenaan akan dimulakan.

**JAWAPAN**

Tuan Yang di-Pertua,

Kementerian Pendidikan Malaysia (KPM) ingin memaklumkan bahawa projek pembinaan SMK Matu, Daro merupakan projek pembinaan gantian penuh 28 bilik darjah dan asrama bagi kapasiti 250 orang pelajar serta lain-lain kemudahan dengan anggaran kos berjumlah RM75 juta. Lokasi projek telah dikenal pasti iaitu di Lot 2864, Blok 5, Jemoreng. Projek ini diluluskan pelaksanaannya dalam *Rolling Plan* Kedua (RP2) Rancangan Malaysia Kesebelas (RMKe-11) Tahun 2017. Sehingga kini, status projek ini sedang dalam proses pelantikan perunding yang dijangka pada 26 Oktober 2019. Agensi pelaksana bagi projek ini ialah Jabatan Kerja Raya (JKR) Sarawak dan kerja-kerja pembinaan akan dilaksanakan sebaik perolehan dimuktamadkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN JUGAH ANAK MUYANG @ TAMBAT  
[ LUBOK ANTU ]**

**TARIKH : 31 OKTOBER 2019 (KHAMIS)**

**SOALAN NO. 25**

Minta **MENTERI PENDIDIKAN** menyatakan apakah status terkini bekalan elektrik bagi sekolah yang berdekatan dengan grid elektrik [SESCO] Sarawak Energy Berhad serta bekalan air terawat dari sumber Jabatan Bekalan Air Luar Bandar [JBALB] bagi kemudahan pelajar, guru dan kakitangan sekolah yang berkaitan iaitu SK Nanga Kesit [elektrik dan bekalan air], SK Nanga Menyebat [elektrik], SK Ulu Lemanak [elektrik], SK Nanga Kumpang [elektrik dan bekalan air], SK Nanga Aup [elektrik dan bekalan air], SK Merbong [elektrik], SK Empelam [elektrik dan bekalan air], SK Ijok [elektrik dan bekalan air], SK Basi [elektrik dan bekalan air], SK Nanga Tebat [elektrik] dan SK Tabut [elektrik].

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan semua sekolah di bawah KPM mempunyai kemudahan infrastruktur yang lengkap. Sehubungan itu, KPM juga bekerjasama dengan Kerajaan Negeri Sarawak bagi memastikan projek penyambungan ke talian grid bekalan utama elektrik dan bekalan air awam di sekolah-sekolah di negeri Sarawak dapat dilaksanakan.

## **NO. SOALAN 25**

Berikut merupakan status terkini penyediaan kemudahan bekalan elektrik dan bekalan air awam kepada sekolah-sekolah yang berkenaan:

### **1. Sekolah Kebangsaan Nanga Kesit**

Bekalan air awam telah disambungkan ke sekolah ini pada tahun 2018 lagi.

Bagi penyambungan bekalan elektrik dari talian grid awam, cadangan pelaksanaan ini telah dimasukkan di bawah inisiatif pembiayaan oleh Kerajaan Negeri Sarawak dengan peruntukan sebanyak RM100,340.00. Kerja-kerja penyambungan ke talian grid ini akan dilaksanakan oleh Kerajaan Negeri Sarawak sendiri melalui agensinya iaitu Sarawak Energy Berhad (SEB).

### **2. Sekolah Kebangsaan Nanga Kumpang dan Sekolah Kebangsaan Nanga Aup**

Kemudahan bekalan air awam akan disambung ke dua (2) buah sekolah ini seawal tahun 2022 dengan anggaran kos sebanyak RM60,000.00 setiap sekolah. Jarak sumber bekalan air awam yang terdekat adalah dianggarkan sejauh 20 kilometer dari sekolah ini.

Seperti Sekolah Kebangsaan Nanga Kesit tadi, Sekolah Kebangsaan Nanga Kumpang dan Sekolah Nanga Aup ini juga telah dirangkumkan dalam cadangan pelaksanaan penyambungan ke talian grid awam di bawah pembiayaan Kerajaan Negeri Sarawak dengan anggaran peruntukan masing-masing berjumlah RM89,290.00 dan RM89,870.00. Kerja-kerja penyambungan ke talian grid akan dilaksanakan oleh SEB.

### **3. Sekolah Kebangsaan Merbong**

Isu berbangkit mengenai Sekolah Kebangsaan Merbong ini adalah berkenaan kemudahan bekalan elektrik. Berdasarkan kepada semakan pihak Kementerian, sekolah ini turut disenaraikan di bawah cadangan untuk penyambungan talian grid awam di bawah



## **NO. SOALAN 25**

pembiayaan Kerajaan Negeri Sarawak dengan anggaran peruntukan sebanyak RM48,240.00.

### **4. Sekolah Kebangsaan Empelam**

Kemudahan bekalan air awam akan disambung pada tahun 2021 dengan anggaran kos sebanyak RM75,000. Kerja-kerja penyambungan bekalan air ini akan mengambil sedikit masa kerana jarak paling hampir dengan sumber bekalan air awam adalah sejauh 7 kilometer daripada sekolah.

SK Nanga Empelam termasuk dalam cadangan untuk penyambungan talian grid awam di bawah pembiayaan Kerajaan Negeri Sarawak dengan anggaran peruntukan sebanyak RM71,670.00.

### **5. Sekolah Kebangsaan Basi dan Sekolah Kebangsaan Ijok**

Kedua-dua sekolah ini dijangka akan menerima kemudahan bekalan air awam seawal tahun 2022 dengan anggaran kos sebanyak RM60,000.00 setiap sekolah memandangkan jarak sekolah dengan sumber bekalan air awam yang terdekat adalah antara 11 dan 12 kilometer.

### **6. Sekolah Kebangsaan Nanga Tebat**

SK Nanga Tebat termasuk dalam cadangan untuk penyambungan talian grid awam di bawah pembiayaan Kerajaan Negeri Sarawak dengan anggaran peruntukan sebanyak RM69,550.00.

Bagi sekolah-sekolah lain yang menghadapi masalah bekalan elektrik dan bekalan air terawat, pihak sekolah hendaklah memaklumkan dan mengemukakan permohonan kepada Jabatan Pendidikan Negeri (JPN) melalui Pejabat Pendidikan Daerah (PPD) masing-masing agar tindakan yang sewajarnya dapat diambil.

Sekian, terima kasih.

PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS

---

**PERTANYAAN : LISAN**

**DARIPADA : TUAN SHAHARIZUKIRNAIN BIN ABD. KADIR  
[ SETIU ]**

**TARIKH : 31 OKTOBER 2019 (KHAMIS)**

**SOALAN NO. 26**

Minta **MENTERI PENDIDIKAN** menyatakan implikasi penggabungan UMT dan UniSZA serta implikasi secara khusus kepada cawangan-cawangan universiti tersebut seperti di Tembila, Setiu.

**JAWAPAN**

Tuan Yang di-Pertua,

**RASIONAL PENGGABUNGAN UMT-UniSZA**

Berdasarkan kepada kebolehpayaan dan kepakaran kedua-dua universiti, Mesyuarat Jemaah Menteri pada 5 April 2019 telah mencadangkan supaya kedua-dua universiti ini digabungkan. Sehubungan dengan itu, Kementerian telah menubuhkan satu Jawatankuasa Pemandu yang diketuai oleh Ketua Pengarah Pendidikan Tinggi (KPPT) untuk memastikan proses penggabungan ini dapat dilaksanakan dengan efisien dan efektif.

Melalui perbincangan awal pada 26 dan 27 September 2019, UMT dan UniSZA telah bersetuju untuk menggunakan peluang penggabungan ini bagi memperkasakan lagi kebitaraan bidang fokus kedua-dua buah universiti, mempertingkatkan kualiti perkhidmatan serta memberi lebih nilai tambah kepada mahasiswa, fakulti serta komuniti setempat.

Beberapa sesi libat urus telah diadakan bersama-sama pihak berkepentingan universiti iaitu Pengerusi LPU, pengurusan tertinggi, wakil-wakil staf akademik, staf pentadbiran dan sokongan, mahasiswa dan alumni. Kementerian juga telah mendapatkan maklumbalas daripada wakil-wakil agensi persekutuan seperti Jabatan Perkhidmatan Awam (JPA), Kementerian Kewangan (MOF), Jabatan Peguam Negara (AGC) dan Kementerian Hal Ehwal Ekonomi (MEA). Sesi libat urus bersama Gabungan Majlis Presiden Dan Setiausaha Kehormat Kesatuan Kakitangan Universiti/IPTA Malaysia (GAKUM) juga telah dilaksanakan.

Dapatan awal perbincangan dengan pihak berkepentingan telah memperlihatkan keupayaan dan potensi UMT dan UniSZA sebagai sebuah universiti baharu yang menjadi peneraju terulung dalam integrasi keilmuan Islam dan sains terutamanya dalam bidang Ilmu Peradaban Islam dan Sains Kelautan. Rasionalisasi penggabungan UMT-UniSZA ialah:

## NO. SOALAN: 26

1. Melonjakkan pencapaian dan kecemerlangan akademik, penyelidikan dan pengantarabangsaan;
2. Melipat ganda kapasiti, keberhasilan dan impak sumber manusia, kepakaran dan fasiliti universiti;
3. Perluasan akses dan kemudahan, fasiliti, infrastruktur kepada para pelajar dan kakitangan. Perluasan akses dan kemudahan ini akan mempertingkatkan kualiti pembangunan pelajar dari segi akademik dan sahsiah;
4. Menjadi sebuah pusat rujukan kebitaraan di peringkat global dalam era merentas disiplin (transdisciplinary);

Justeru, penggabungan ini bakal memperkasakan hub pendidikan tinggi di negeri Terengganu serta memperkukuhkan kebitaraan bidang fokus sedia ada dan mengembangkan kebitaraan bidang fokus baharu dapat diwujudkan melalui aktiviti *transdisciplinary*. Kerajaan akan memastikan penggabungan ini tidak akan merugikan mana-mana pihak yang terlibat kerana ia dapat melonjakkan prestasi dan pencapaian universiti ke tahap yang lebih cemerlang di peringkat negara dan antarabangsa. Sesi libat urus bersama pihak berkepentingan akan diteruskan bagi melicinkan proses penggabungan dalam tempoh yang ditetapkan.

Sekian, terima kasih.

**NO. SOALAN: 26**

**PEMBERITAHUAN PERTANYAAN DEWAN RAKYAT,  
MESYUARAT KETIGA, PENGGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI ANWAR BIN IBRAHIM  
(PORT DICKSON)**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTAHANAN** menyatakan apakah langkah yang diambil Kerajaan untuk mengemaskinikan aset pertahanan udara; dan sama ada Kerajaan berhasrat untuk menggantikan pesawat-pesawat tersebut serta sejauh mana penilaian yang telah dibuat bagi menggantikan aset-aset pertahanan yang usang secara menyeluruh.

**JAWAPAN**

Tuan Yang di-Pertua,

Kementerian amat komited dan sentiasa mengambil langkah pro-aktif untuk mengemaskini aset pertahanan udara. Kementerian memperakui terdapat keperluan peningkatan dan pembangunan keupayaan pertahanan udara demi memastikan Tentera Udara Diraja Malaysia (TUDM) kekal relevan untuk memantau dan mempertahankan ruang udara negara. Keperluan ini bukan sahaja kerana aset dan sistem yang dimiliki TUDM telah usang tetapi juga berdasarkan perkembangan geo-strategik dan perkembangan teknologi masa kini dan akan datang. Antara pesawat dan sistem milik TUDM yang sudah usang berpandukan Dasar Kasting iaitu had umur yang ekonomik yang ditetapkan Angkatan Tentera Malaysia (ATM) adalah seperti pesawat pejuang MiG-29, HAWK dan F/A-18D, helikopter Nuri, pesawat angkut C130 dan sistem Radar Pertahanan Udara.

Rancangan pengemaskinian aset pertahanan udara ini akan dilaksanakan berdasarkan Pelan Pembangunan Keupayaan TUDM 2055 atau CAP55 yang diformulasikan oleh pihak pengguna sendiri iaitu TUDM. Pelan ini menggariskan perancangan menyeluruh pembangunan keupayaan TUDM sehingga tahun 2055 yang merangkumi perolehan aset baru selari dengan peredaran masa, penggantian pesawat yang usang dan naik taraf aset sedia ada. Pelan ini mengambil kira faktor perancangan yang realistik berdasarkan keutamaan masa yang berfokuskan kepada pengurangan jenis pesawat, menangani isu keusangan dan peningkatan kos senggaraan.

Kementerian komited terhadap pelaksanaan pelan CAP55 agar penggantian aset-aset TUDM yang usang secara menyeluruh dapat dilaksanakan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN EMPAT BELAS**

---

**PERTANYAAN : JAWAB LISAN**

**DARIPADA : YB DATUK SERI HISHAMMUDDIN TUN HUSSEIN  
(SEMBRONG)**

**TARIKH : 31 OKTOBER 2019**

**SOALAN**

**DATO' SERI HISHAMMUDDIN BIN TUN HUSSEIN [ SEMBRONG ]** minta  
**MENTERI DALAM NEGERI** menyatakan :-

(a) apakah tindakan yang telah diambil oleh pihak Kerajaan ke atas sebilangan individu yang telah membangkitkan isu-isu sensitif berkaitan agama dan bangsa yang telah menimbulkan kemarahan rakyat di negara ini; dan

(b) apakah usaha yang telah dilakukan oleh Kerajaan untuk mengekang kegiatan ini agar tidak terus berleluasa.



**JAWAPAN**

Tuan Yang Di Pertua,

Kementerian Dalam Negeri melalui penguatkuasaan pihak polis akan mengambil tindakan tegas dengan melakukan tangkapan dan pendakwaan terhadap mana-mana individu yang membangkitkan isu-isu sensitif berkaitan agama dan bangsa berdasarkan peruntukan undang-undang yang sedia ada seperti Akta Hasutan 1948, Kanun Keseksaan mahupun Akta Komunikasi dan Multimedia 1998.

Bagi mengekang kegiatan ini agar tidak terus berleluasa, Kementerian Dalam Negeri akan meningkatkan program kesedaran kepada masyarakat supaya lebih peka dan sensitif terhadap sentimen perkauman, keagamaan dan institusi Diraja melalui kempen-kempen kesedaran bersama orang awam. Selain itu, kementerian juga sedang membuat kajian dan cadangan penambahbaikan ke atas akta-akta sedia supaya tindakan lebih berkesan dan menyeluruh dapat diambil oleh pihak polis terhadap mana-mana pihak yang terus membangkitkan isu-isu sensitif tersebut.

Pada masa ini, pihak polis telah menubuhkan unit pemantauan dan siasatan terhadap penyalahgunaan media sosial di peringkat daerah dan kontinjen supaya tindakan segera dapat diambil sebelum isu-isu sensitif yang dimainkan oleh pihak terbabit merebak menjadi permusuhan antara agama dan bangsa.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AWANG HUSAINI BIN SAHARI  
[ PUTATAN ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PENDIDIKAN** menyatakan apakah Kementerian bersedia untuk mengkaji semula dasar Kementerian berkenaan perwakilan kuasa kepada Lembaga Perolehan Persekutuan Sabah yang membolehkan projek-projek di bawah harga RM5 juta diluluskan oleh Jabatan Pendidikan Negeri Sabah tanpa melalui Kementerian. Ini kerana sejak 2015 perolehan ini tidak lagi dapat dilaksanakan memandangkan senarai permohonan yang diangkat oleh Jabatan Pendidikan Negeri Sabah telah diluluskan secara berpakej dan ianya melebihi daripada kuasa Lembaga Perolehan Persekutuan Sabah.

**JAWAPAN**

Tuan Yang di-Pertua,

Berdasarkan kepada prosedur perolehan Kerajaan yang sedang berkuat kuasa, semua perolehan secara tender hendaklah dipertimbangkan dalam mesyuarat Lembaga Perolehan. Kementerian Pendidikan Malaysia (KPM) telah mewakilkan kuasa kepada Lembaga Perolehan Persekutuan Sabah (LPPS) untuk mempertimbangkan tender yang dilaksana dan dikemukakan oleh Jabatan Pendidikan Negeri (JPN) Sabah bermula tahun 2014 dan ianya masih dilaksanakan sehingga kini.

Walau bagaimanapun, bagi projek di Sabah dan Sarawak, Ketua Setiausaha KPM selaku Pegawai Pengawal berhak untuk menentukan pertimbangan dan keputusan bagi perolehan suatu perkhidmatan dibuat sama ada di peringkat Lembaga Perolehan Kementerian/Jabatan yang menyalurkan peruntukan tersebut atau di Lembaga Perolehan Persekutuan Sabah/Sarawak (LPPS).

Untuk makluman Ahli Yang Berhormat juga, pertimbangan tender tidak boleh dilaksanakan oleh JPN Sabah kerana ia bertentangan dengan prosedur perolehan Kerajaan di mana urusan tender tidak boleh berperanan sebagai urusan Setia Mesyuarat Lembaga Perolehan bagi mengelakkan sebarang isu yang boleh dipertikaikan kelak seperti *conflict of interest*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : DATO' SERI MAHDZIR BIN KHALID**  
**[ PADANG TERAP ]**  
**TARIKH : 31 OKTOBER 2019 (KHAMIS)**

**SOALAN NO. 30**

Minta **MENTERI PENDIDIKAN** menyatakan sejauh manakah penutupan 21 daripada 27 Institut Pendidikan Guru (IPG) di seluruh negara pada tahun hadapan merupakan dasar daripada kepimpinan Kerajaan terdahulu.

**JAWAPAN**

Tuan Yang di-Pertua,

Satu kenyataan media telah dikeluarkan oleh Kementerian Pendidikan Malaysia (KPM) pada 10 September 2019 yang menyatakan bahawa tiada Institut Pendidikan Guru (IPG) yang disyorkan untuk ditutup mulai tahun hadapan.

Ketika ini, kesemua 27 IPG di seluruh negara adalah dikekalkan bagi melaksanakan fungsi latihan perguruan serta latihan guru dalam perkhidmatan. KPM percaya bahawa sebarang perancangan perlu melibatkan semua pemegang taruh dan pihak berkepentingan terutamanya para pensyarah dan pelajar IPG. Usaha tersebut termasuklah mengambil kira kesan jangka panjang dan masa hadapan lanskap pembangunan profesionalisme keguruan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NURUL IZZAH BINTI ANWAR  
[ PERMATANG PAUH ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan :-

- a. langkah susulan Kementerian atas Projek PSR apabila pampasan yang diterima nelayan tidak setimpal dengan kesan yang bakal ditanggung dalam jangka masa 30 tahun; dan
- b. adakah Kementerian bercadang memenuhi tuntutan kelengkapan dan peralatan nelayan contohnya kapal berkapasiti tinggi.

**JAWAPAN**

Yang di-Pertua,

1. *Penang South Reclamation* (PSR) merupakan usaha Kerajaan Negeri Pulau Pinang untuk menebus guna 1,821.085 hektar kawasan laut bagi membina tiga pulau buatan. Projek PSR ini bertujuan menjana pembangunan ekonomi negeri dan membiayai pelaksanaan Pelan Induk Pengangkutan (PIP). Difahamkan jangka masa projek tebus guna adalah selama 15 tahun dan keseluruhan projek dijangka siap antara 30 hingga 50 tahun. Projek ini dijangka akan menjejaskan sumber perikanan dan pendapatan seramai 4,996 nelayan dan 511 penternak akuakultur marin di Pulau Pinang.

2. Bagi menjawab pertanyaan mengenai langkah susulan Kementerian sekiranya pampasan yang diterima oleh nelayan tidak setimpal dengan kesan yang bakal ditanggung dalam jangka masa 30 tahun, Kementerian akan memperluaskan program-program sedia ada bagi meningkatkan pendapatan nelayan. Program-program ini dijangka dapat meningkatkan pendapatan nelayan antara RM500 hingga RM700 sebulan. Antara program-program tersebut adalah seperti berikut:

- Memperkenalkan program tanaman kontan seperti cili, nenas dan jagung bijian yang merupakan tanaman singkat masa dan tidak melebihi satu tempoh penanaman di kalangan nelayan yang terbabit.
- Projek ternakan akuakultur dalam sangkar secara berkelompok dan berskala besar.
- Program industri hiliran dan agropelancongan yang berasaskan perikanan bagi mempelbagaikan aktiviti ekonomi nelayan.

3. Manakala bagi pertanyaan mengenai adakah Kementerian akan memenuhi tuntutan kelengkapan dan peralatan nelayan, Kementerian menyokong agar tuntutan ini dilaksanakan oleh Kerajaan Negeri. Kementerian difahamkan Persatuan Nelayan Negeri Pulau Pinang ada membuat tuntutan kepada Kerajaan Negeri Pulau Pinang bagi pemberian bot moden kepada nelayan yang terkesan.

4. Tuntutan ini adalah selari dengan hasrat Kementerian untuk mentransformasi penggunaan bot kayu tradisional kepada bot fiber yang lebih moden dan selamat kepada nelayan tradisional pesisir pantai. Lembaga Kemajuan Ikan Malaysia (LKIM) telah menyediakan Program Pinjaman Mudah Dana Nelayan dengan bantuan pembiayaan berjumlah RM1,000 hingga RM70,000 bagi pembelian baharu, pembaikan enjin serta peralatan menangkap ikan dan penggantian kulit bot kepada nelayan pesisir pantai.

5. Manakala bagi nelayan komersial, mereka digalakkan untuk menerokai kawasan penangkapan ikan di laut dalam yang lebih jauh dengan lebih moden dan selamat. Bagi tujuan ini, Garis Panduan Panduan Pemodenan Vesel Penangkapan Ikan telah disediakan selaras dengan piawaian yang ditetapkan oleh *International Maritime Organization* (IMO), *International Conventions* dan *International Association of Classification Societies* (IACS).

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KETIGA, PENGGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI HAJI AHMAD BIN HAMZAH  
(JASIN)**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTAHANAN** menyatakan adakah persempadanan maritim baru yang telah dilaksanakan oleh TLDM baru-baru ini telah mengambil kira persetujuan daripada 7 negara jiran yang bermasalah termasuk negara China.



**JAWAPAN**

Tuan Yang di-Pertua,

Kementerian Pertahanan melalui Tentera Laut Diraja Malaysia (TLDM) tidak pernah membuat persempadanan maritim yang baru. Untuk makluman, penentuan sempadan maritim negara dilaksanakan melalui proses rundingan dengan negara jiran oleh Jawatankuasa Teknikal Pembatasan Sempadan Maritim yang diketuai oleh Kementerian Luar Negeri. Jawatankuasa Teknikal ini turut dianggotai oleh Majlis Keselamatan Negara, Jabatan Peguam Negara, Jabatan Ukur dan Pemetaan Malaysia, Pusat Hidrografi Nasional TLDM - Kementerian Pertahanan, Jabatan Laut Malaysia, Jabatan Perikanan Malaysia dan beberapa agensi lain yang berkepentingan.

Sehingga kini persempadanan maritim negara yang rasmi masih merujuk kepada Peta Menunjukkan Sempadan Perairan dan Pelantar Benua Malaysia 1979 yang diwartakan pada 21 Disember 1979. Peta ini juga digunakan sebagai rujukan dalam memelihara kedaulatan maritim negara dan penguatkuasaan undang-undang yang berkaitan. Peta ini akan dikemas kini dari semasa ke semasa dengan memasukkan garisan sempadan maritim yang telah dimuktamadkan oleh Malaysia dengan negara-negara jiran.

Rundingan pembatasan maritim dengan negara jiran masih berlangsung melibatkan beberapa segmen yang masih belum selesai. Jawatankuasa Teknikal Pembatasan Sempadan Maritim akan mencari jalan penyelesaian yang tuntas bagi memastikan kepentingan negara dalam isu persempadanan maritim tidak terjejas. Namun, perlu juga diakui bahawa proses ini memerlukan masa, komitmen dan kesabaran demi mendapatkan solusi yang disepakati secara bersama.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN MUSLIMIN BIN YAHAYA  
[ SUNGAI BESAR ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan usaha untuk menaikkan taraf sistem palong dan sistem pengairan di kawasan jelapang padi IADA Barat Laut Selangor khususnya kawasan Sabak Bernam/Sungai Besar/Sekinchan/Tanjung Karang.

**JAWAPAN**

Tuan Yang di-Pertua,

1. Untuk makluman Ahli Yang Berhormat, kawasan pengairan bagi Kawasan Pembangunan Pertanian Bersepadu (IADA) Barat Laut Selangor melibatkan 8 kawasan pengairan utama iaitu Sawah Sempadan, Sungai Burong, Sekinchan, Sungai Besar, Sungai Leman, Pasir Panjang, Bagan Terap dan Panchang Bedena yang melibatkan kawasan seluas 19,690 hektar.

2. Antara usaha untuk menaiktaraf sistem palong dan sistem pengairan di kawasan jelapang padi IADA Barat Laut Selangor khususnya kawasan Sabak Bernam, Sungai Besar, Sekinchan dan Tanjung Karang adalah seperti berikut:

- i. Membina dan menaiktaraf infrastruktur pengairan dan kerja-kerja berkaitan di kawasan pengairan Sungai Panjang Fasa 2. Kerja-kerja yang terbabit adalah menaiktaraf taliair tanah kepada konkrit untuk jajaran parit sepanjang 2.27km di Sungai Panjang.
- ii. Membaikpulih dan menaiktaraf taliair tersier (palong) sekiranya hasil Kajian Semula Keberkesanan Taliair Tersier dapat mengenalpasti keadaan fizikal dan kecekapan penyaluran air ke semua kawasan di IADA Barat Laut Selangor; dan
- iii. Menaiktaraf struktur-struktur pengairan seperti pintu-pintu kawalan air yang mana telah dikenalpasti mengalami kerosakan. Selain itu, kerja-kerja menaiktaraf Terusan Feeder juga dilakukan bertujuan memastikan jumlah kuantiti dan bekalan air yang mencukupi kepada kawasan pengairan.

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KETIGA, PENGGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN AHMAD FADHLI BIN SHAARI  
(PASIR MAS)**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTAHANAN** menyatakan penjelasan berhubung projek kapal tempur pesisir pantai (LCS) pertama milik Tentera Laut Diraja Malaysia (TLDM) yang dijangka ditauliahkan pada 2021, berapa jumlah yang telah dibelanjakan kepada pihak kontraktor berbanding perancangan asal, dan setakat mana keterlibatan pemain tempatan dan manfaat yang diperolehi dari program "*transfer of technology*" dari pembuat asal peralatan (OEM).

**JAWAPAN**

Tuan Yang di-Pertua,

Berakhir September 2019, pembayaran yang melibatkan perolehan 6 buah *Littoral Combat Ship* (LCS) kepada limbungan Boustead Naval Shipyard Sdn Bhd (BNSSB) adalah berjumlah RM6.04 bilion berbanding perancangan asal berjumlah RM7.15 bilion.

Secara keseluruhan, pembinaan LCS ini dilaksanakan sepenuhnya oleh limbungan BNSSB yang merupakan limbungan tempatan yang dilantik oleh pihak kerajaan berdasarkan Rundingan Terus. Kolaborasi di antara limbungan BNSSB dengan pembuat asal peralatan (Original Equipment Manufacturer - OEM) telah memainkan peranan penting di dalam memastikan '*transfer of technology and knowledge*' seperti aktiviti pembinaan kapal dan latihan diterima sepenuhnya oleh limbungan dan syarikat tempatan bagi meningkatkan kepakaran serta kemahiran di dalam pembinaan kapal-kapal baharu berpandukan teknologi terkini.

Melalui kontrak perolehan LCS ini, 3 syarikat tempatan utama (STU) iaitu Syarikat BNSSB, Syarikat Contraves Advances Devices (CAD) dan Syarikat MTU Services Sdn Bhd serta 18 pembuat asal peralatan (OEM) telah menyumbang kepada 81 program *offset* yang memberi manfaat kepada lebih 400 syarikat tempatan.

Kementerian Pertahanan juga sentiasa mematuhi Dasar dan Garis Panduan Kolaborasi Industri atau *Industrial Collaboration Programme* dalam semua prosedur perolehannya. Justeru dengan itu, bagi kontrak perolehan LCS, daripada jumlah keseluruhan program *offset* yang tersebut di atas, sebanyak 35% adalah *Transfer of Technology* (ToT) telah diperolehi dan dimanfaatkan oleh syarikat tempatan. Terdapat pelbagai pengetahuan dan teknologi yang telah dipindahkan oleh pembuat asal peralatan (OEM) kepada syarikat tempatan Malaysia yang antaranya ialah pakej data teknikal, teknologi reka bentuk kapal LCS, dokumentasi dan manual.

Pemindahan teknologi dan pengetahuan ini telah mewujudkan kepakaran tempatan dan turut memberi manfaat kepada syarikat tempatan dalam menguasai aspek reka bentuk kapal, kejuruteraan, pemasangan, pengujian dan aktiviti-aktiviti sokongan yang lain. Secara tidak langsung, pemindahan pengetahuan dan teknologi ini juga dapat meningkatkan keupayaan sumber tenaga kerja, kemahiran dan kompetensi pekerja tempatan.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KE EMPAT BELAS**

---

**PERTANYAAN : LISAN**

**DARIPADA : DATO' HAJI MOHD FASIAH BIN HAJI  
MOHD FAKEH [ SABAK BERNAM ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan setakat manakah Kementerian mengenal pasti kerosakan tanaman pertanian dan ternakan yang dialami oleh petani, pesawah dan pekebun kecil akibat ribut taufan yang melanda seluruh negara baru-baru ini dan nyatakan langkah Kementerian bagi membantu golongan petani, pesawah dan pekebun kecil yang kerugian akibat bencana alam ini khususnya di Parlimen Sabak Bernam.

**JAWAPAN**

Yang di-Pertua,

1. Kerosakan ternakan yang telah dikenalpasti akibat ribut taufan yang melanda seluruh negara baru-baru ini di Parlimen Sabak Bernam adalah seperti berikut:

BIL	NAMA PEMOHON	KAD PENGEN ALAN	KAUM	JENIS TANAMAN/ TERNAKAN/	LUAS MUSNAH (HEKTAR)/ BIL	ANGGARAN NILAI KEROSAKAN (RM)
1	MUHAMMAD SHAFIQ BIN OTHMAN	970623-10-6627	MELAYU	KAMBING	KANDANG ROSAK	1,000.00
2	SALIHUDDIN BIN PARMIN	581216-10-5345	MELAYU	AYAM PEDAGING	REBAN ROSAK	500.00
<b>JUMLAH KESELURUHAN UNTUK PENTERNAK/USAHAWAN TERJEJAS (LAPORAN SEHINGGA 18/08/2019)</b>						<b>1,500.00</b>

2. Bagi membantu meringankan beban pesawah yang dilanda bencana, pihak Kementerian telah mewujudkan Tabung Bencana Bantuan Padi yang disalurkan melalui Lembaga Pertubuhan Peladang (LPP) sejak tahun 2017. Pada tahun 2019, sebanyak RM708,015.85 telah disalurkan ke negeri seperti berikut:

BIL	NEGERI	NILAI PERUNTUKAN (RM)	BIL PENERIMA (ORANG)
1	Negeri Sembilan	20,520.00	4
2	Perak	168,243.45	164
3	Kedah (Padang Terap)	15,404.85	23
4	Kedah (MADA)	503,847.55	295
	<b>JUMLAH</b>	<b>708,015.85</b>	<b>486</b>

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN YUSUF BIN ABD. WAHAB  
[ TANJUNG MANIS ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTANIAN DAN INDUSTRI ASAS TANI** menyatakan berapakah jumlah nelayan yang telah mendapat bantuan bot fiber dan enjin di Parlimen Tanjong Manis. Apakah bantuan bot fiber dan enjin ini akan diteruskan.



**JAWAPAN**

Yang di-Pertua,

1. Kementerian melalui Lembaga Kemajuan Ikan Malaysia (LKIM) sentiasa komited untuk meningkatkan pendapatan dan menjamin kebajikan serta keselamatan nelayan. Dalam usaha mentransformasi penggunaan bot kayu tradisional kepada bot fiber yang lebih moden dan selamat, bantuan bot fiber dan enjin telah disediakan kepada nelayan pesisir pantai di seluruh negara termasuk di Parlimen Tanjong Manis melalui program seperti berikut:

- Program Rezeki Tani yang menyalurkan bantuan seperti bot fiber, bot kayu, enjin sangkut dan peralatan menangkap ikan kepada nelayan yang tergolong dalam kategori miskin tegar. Sehingga tahun 2019, LKIM telah menyalurkan bantuan sebanyak RM13.3 juta kepada seramai 1,339 nelayan di Tanjong Manis.
- Program Pinjaman Mudah Dana Nelayan yang menyediakan bantuan pembiayaan berjumlah RM1,000 hingga RM70,000 bagi pembelian baharu, pembaikan enjin serta peralatan menangkap ikan dan penggantian kulit bot kepada nelayan pesisir pantai. Sehingga tahun 2019, sejumlah RM0.6 juta telah diluluskan kepada 37 nelayan di Tanjong Manis.

2. Berdasarkan laporan pemantauan oleh LKIM, program tersebut telah menunjukkan impak positif dalam peningkatan pendapatan nelayan. Sebagai contoh, Kajian Dana Nelayan pada tahun 2017 menunjukkan pendapatan nelayan pesisir pantai meningkat daripada RM1,500 kepada RM3,800 sebulan. Oleh yang demikian, Kementerian akan meneruskan pelaksanaan program bantuan bot fiber dan enjin tertakluk kepada peruntukan semasa Kerajaan bagi memastikan ekonomi nelayan pesisir pantai dapat ditingkatkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI HAJI IDRIS BIN JUSOH [ BESUT ]**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PENDIDIKAN** menyatakan adakah Kementerian masih memberi tumpuan ke atas penarafan kedudukan tahunan ranking Universiti-universiti Awam (UA); jika ada, apakah usaha-usaha yang telah diambil bagi tujuan tersebut.

**JAWAPAN**

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) berpendirian bahawa *ranking* institusi pendidikan tinggi (IPT) adalah penting tetapi bukan menjadi matlamat utama sesebuah IPT.

Sebaliknya aspek yang sedang mendapat perhatian serius KPM kini adalah untuk meningkatkan kualiti berteraskan nilai dan kemanusiaan melalui elemen kasih sayang, kegembiraan dan hormat-menghormati. Di dalam Pelan Pembangunan Pendidikan Malaysia 2015-2025 (Pendidikan Tinggi), aspek kualiti adalah salah satu teras yang menjadi keutamaan, tetapi kerajaan baharu mahukan lebih banyak hasil terutamanya kualiti para pensyarah, kualiti graduan, kualiti kurikulum dan kecekapan mengurus kos dalam ekosistem yang lebih mapan. Ini penting bagi memastikan kecemerlangan berterusan di dalam sistem pendidikan tinggi.

Justeru, KPM sedang melaksanakan transformasi penawaran program akademik universiti awam (UA) bagi memastikan program akademik yang hendak ditawarkan merupakan program yang relevan,

terkini dan mempunyai kadar kebolehpasaran graduan yang tinggi. Manakala, program akademik yang dikekalkan dalam sistem penawaran adalah program yang menepati aspek keperluan tenaga negara, laluan kerjaya dan tahap kebolehpasaran graduan dan tiada duplikasi program akademik sedia ada di kalangan IPT.

Walau bagaimanapun, KPM terus berusaha untuk memperkukuhkan kedudukan UA di peringkat antarabangsa melalui memperbanyakkan program *partnership* dan kolaborasi dengan institusi terkemuka dunia melalui skim padanan geran penyelidikan. Antara kolaborasi tersebut adalah kerjasama dengan *Research Councils United Kingdom* (RCUK) sejak tahun 2016, *Japan Science and Technology Agency* (JST) sejak tahun 2015 dan *Japan International Cooperation Agency* (JICA) sejak tahun 2012. Selain itu, KPM juga dalam proses untuk bekerjasama dengan agensi penyelidikan antarabangsa yang berpotensi seperti *South East Asia Europe, Department of Guangxi Zhuang Autonomous Region Republic of China* dan E-Asia JRP.

Bagi peningkatan kualiti IPT terutamanya institusi pendidikan tinggi swasta (IPTS), penarafan peringkat nasional telah pun dilaksanakan ke atas IPTS iaitu *Malaysia Rating for University and College University Excellent* (SETARA) dan *Malaysian Quality Evaluation System* (MyQUEST). Antara indikator terlibat dalam penilaian penarafan ini kualiti program yang ditawarkan, tadbir urus yang baik, sistem pengurusan berkualiti, pengurusan pelajar antarabangsa, kebajikan pelajar dan penyelidikan. Sistem penarafan ini memberikan daya saing di antara IPTS untuk menjadi IPTS yang terbaik dan berkualiti.

Selain usaha memperlihatkan jenama pendidikan IPT ke peringkat antarabangsa, KPM terus memperkasa usaha promosi bagi meningkatkan kemasukan pelajar antarabangsa ke Malaysia melalui promosi antarabangsa antara kerajaan (*G to G*), rundingan secara berterusan dengan pihak Kerajaan dan universiti di luar negara serta kerjasama antara KPM dengan kedutaan di negara lain bagi memudahkan urusan kemasukan pelajar antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI PANGLIMA DR. MAXIMUS  
JOHNITY ONGKILI [ KOTA MARUDU ]**

**TARIKH : 31 OKTOBER 2019 (KHAMIS)**

**SOALAN NO. 38**

Minta **MENTERI PENDIDIKAN** menyatakan apakah apakah perkembangan terkini mengenai perlaksanaan pembinaan SMK Marak Parak, Kota Marudu yang telah diluluskan oleh Kerajaan Pusat pada awal 2018. Berapa banyak jumlah peruntukan yang diluluskan dan bilakah pembinaannya akan dimulakan.

**JAWAPAN**

Tuan Yang di-Pertua,

Untuk makluman Ahli Yang Berhormat, pembinaan SMK Marak Parak, Kota Marudu masih dalam cadangan dan perlu melalui beberapa prosedur yang ditetapkan sebelum cadangan pembinaan tersebut diluluskan. Buat masa ini, pihak Jabatan Pendidikan Negeri (JPN) Sabah dan Pejabat Pendidikan Daerah (PPD) Kota Marudu sedang dalam proses mengenal pasti tapak projek yang sesuai bagi pembinaan sekolah. Seterusnya cadangan projek akan dimohon dan dikemukakan di dalam Rancangan Malaysia Ke-12 (RMKe-12) sekiranya terdapat keperluan namun adalah tertakluk kepada kelulusan agensi pusat dan kedudukan kewangan semasa negara.

Sekian, terima kasih.

**PEMBERITAHUAN PERTANYAAN DEWAN RAKYAT,  
MESYUARAT KETIGA, PENGGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN KHAIRY JAMALUDDIN (REMBAU)**

**TARIKH : 31 OKTOBER 2019 (KHAMIS)**

**SOALAN**

Minta **MENTERI PERTAHANAN** menyatakan apakah hasil kajian berhubung tawaran Kerajaan Rusia untuk mengambil kembali atau membekalkan alat ganti baru dan khidmat baik pulih jet pejuang milik Tentera Udara Diraja Malaysia (TUDM) sekiranya Kerajaan Malaysia bersetuju untuk membeli jet pejuang baharu dari negara terbabit serta apakah pelan jangka masa terdekat bagi menambah baik keupayaan dan kesiapsiagaan TUDM.

**JAWAPAN**

Tuan Yang di-Pertua,

Pada masa ini, Kementerian Pertahanan lebih menumpukan kepada aset pertahanan bercirikan kawalan dan rondaan sempadan maritim bagi menghalang pencerobohan asing. Sehubungan dengan itu, Tentera Udara Diraja Malaysia (TUDM) telah menyediakan Pelan Pembangunan Keupayaan TUDM 2055 atau CAP55 yang menggariskan perancangan menyeluruh pembangunan keupayaan TUDM sehingga tahun 2055. Pelan ini merangkumi perolehan aset baru selari dengan peredaran masa, penggantian pesawat yang usang dan naik taraf aset sedia ada dengan mengambil kira faktor perancangan yang realistik berdasarkan keutamaan masa yang berfokuskan kepada pengurangan jenis pesawat, menangani isu keusangan dan peningkatan kos senggaraan.

Justeru dengan itu, TUDM akan terus mengekalkan pesawat pejuang F/A-18D Hornet dan Su-30MKM untuk tempoh RMK 12 dan RMK 13. Keperluan terkini adalah perolehan *Maritime Patrol Aircraft* (MPA) dan *Medium Altitude Long Endurance Unmanned Aerial Vehicle* (MALE UAV) serta keupayaan tempur ringan dan latihan juruterbang melalui perolehan *Light Combat Aircraft* (LCA) bagi menambah baik keupayaan dan kesiapsiagaan TUDM.

Walaupun pembelian jet pejuang baharu tiada dalam perancangan TUDM, Kementerian Pertahanan masih meneliti tawaran daripada Kerajaan Rusia tersebut.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROBERT LAWSON CHUAT  
[BETONG]**

**TARIKH : 31 OKTOBER 2019 (KHAMIS)**

**SOALAN NO.40**

Minta **MENTERI PERTANIAN DAN INDUSTRI ASAS TANI** menyatakan jumlah dan keluasan kawasan Skim Pengairan dan Saliran di Sarawak. Nyatakan jumlah peruntukan kepada Sarawak untuk menyelenggara skim tersebut pada tahun 2019.

**JAWAPAN**

Yang di-Pertua,

1. Pada masa sekarang terdapat 84 buah skim dibawah selenggaraan Jabatan Pengairan Dan Saliran (JPS) Sarawak yang meliputi kawasan seluas 91,601 hektar. Skim-skim ini terbahagi kepada tiga (3) jenis iaitu Skim Pengairan, Skim Saliran Terkawal dan Skim Saliran. Skim Pengairan dan Skim Saliran Terkawal adalah berfungsi sebagai kawasan penanaman padi manakala Skim Saliran berfungsi sebagai kawasan tanaman kontan seperti kelapa, pisang, buah-buahan dan lain-lain. Namun terdapat sesetengah kawasan di dalam Skim Saliran turut digunakan sebagai kawasan penanaman padi.

2. Bagi membolehkan infrastruktur sediaada yang terdapat didalam skim ini mengekalkan fungsinya, Kementerian telah memperuntukkan sebanyak **RM 2.12 juta** kepada JPS Sarawak pada 2019 untuk Program Penyelenggaraan Persekutuan Kawasan Luar Jelapang bagi tujuan kerja-kerja menyelenggara infrastruktur pengairan dan saliran di kawasan skim-skim berkenaan

3. Sebagai tambahan, jumlah Skim Dalam Jelapang dibawah seliaan Pejabat Kawasan Pertanian Bersepadu (IADA) adalah seluas **30,251.4 ha** dengan jumlah peruntukan pada tahun 2019 adalah sebanyak **RM2.7 juta**.

Sekian, terima kasih.